

東
華
續
錄

東華續錄

咸豐六

臣王先謙敬編

臣陶澐宣恭校

十一月己丑朔改湖南晃州廳爲衝字簡缺○辛卯徐廣縉奏廣西賊竄永康州該署知州高汝霖在隴東一帶防守聞信立即趕回堵禦詎賊已經竄入州城該署州馳赴各團勸集團練親帶抵城四面用火圍攻賊勢不支紛紛遁去見籌派兵追剿上諭軍機大臣等廣西逆匪竄入永康州劫獄放走人犯殺斃該署州妻女前據鄭祖琛奏報情形已有旨令林則徐等會籌勦辦茲據徐廣縉奏該署知州高汝霖據稱見在隴東地方防守迫聞信趕回賊已入城肆擾是當時該員並未在城究竟在隴東所防何匪因何不知賊匪徑行入城其城守各武弁有無在城堵守均未切實

稟報且該匪等志在搶掠從未占踞城池該署州所稱親往各團
勸集團練四面火攻賊始遁去等語難保非逃避於前裝點於後
以遮飾其失守城池之罪所有廣西署永康州事卽用知州高汝
霖暨該州吏目時榮均著先行革職見在林則徐計已到粵見聞
較近著將該署州及該吏目有無與城守各武弁臨時逃避情形
訪查明確據實參辦毋許徇隱至鄭祖琛咨會徐廣縉所稱此股
賊匪卽係前次擁入明江龍州之匪何以與前奏太平文武節次
攻剿賊鋒大挫等語前後情形不符其賊匪頭目是否與滋擾修
仁荔浦之陳亞漬等同黨分夥並著林則徐查覈確情一併奏聞
不可稍涉含混將此各諭令知之○壬辰諭軍機大臣等據孫瑞
珍奏見接前任漕運總督周天爵來信內言十字河些許小工竟
爲全漕之害若於河西隄改挖新河一段以舊河爲囊沙之渠於

彭江作滾水壩納濁水而漾清流漕船無阻淺起撥之費可省
通池之費幾二十萬金等語著顏以燠悉心查勘妥議具奏又稱
清江三牐實係平水舟可牽挽而過牐實可廢孫瑞珍則稱此項
漕費既可節省卽以所省之費爲辦理添塘之用既非動用正款
又與福濟等前奏相符各等語著陸建瀛楊以增卽於查勘海口
坍塌之便確查惠濟通濟福興三牐是否上下水仍前平流可否
節省漕費爲辦理添塘工用其三牐果否可廢並著詳細履勘悉
心籌議具奏事關保民利漕爲久遠之計斷不可惑於浮言稍存
畏難苟安之見諒該督均能認真籌辦以副委任也原摺均著鈔
給閱看將此各諭令知之○乙未諭軍機大臣等琦善奏遵旨明
白回奏並續捕黑城回匪各一招據稱海蘭地面漢名雍沙見在
剿滅之番子係大囊謙千戶所屬並非玉樹番族近因大囊謙頻

年荼毒良民戕害大員是以帶兵痛剿又摺奏黑城回匪恃險抗拒槍斃官兵經署提督桂齡總兵薩炳阿等分堵該城南北兩門大兵占住山梁用大礮轟擊弁兵蜂擁直前殲斃多名各撒拉回眾投誠獻賊各等語該番等賦性獷悍擾害善良據該督所奏情形自應如此懲辦所獲各犯經甘肅兩司訊明供招後妥爲監禁仍著琦善親提研訊自行具奏候旨辦理該督前奏甘省近邊番賊以柯柯烏蘇爲羣聚之所外來番族麇集於此西路之雍沙東路之黑城等處皆爲賊之腰站是該督此次閱邊旣以柯柯烏蘇爲扼要之地何以帶兵前往聽其竄匿僅將未逃之番賊什加外榮額羣本三名拏獲正法又稱窮追深入勢有不能乃回兵於雍沙黑城等番大加剿滅該督本意是否欲剿除柯柯烏蘇之外賊因不得手始將雍沙等處之內賊掩其不備痛加剿辦該督出省

巡閱摺內僅稱遇有番匪潛出滋擾乘勢掩剿等語未將如何辦理主見詳悉聲明而哈勒吉那陳奏情節又多不同著琦善仍遵前旨將前後勦辦根由據實覆奏毋稍含混至所稱見在撒拉既知畏威懷服獻賊投誠著卽體察情形相機妥辦不值再勞兵力也將此諭令知之○鄭祖琛向榮奏賀縣昭平游匪與土匪勾結復分股四竄延入富川之太平墟而賀縣另股匪徒又由老鴉寒出擾馬峯經參將成安等分路進擊生擒賊首葉添良要犯陳脫並將要犯陳三滿殲斃統計平樂府屬及連界潯州之平南梧州之懷集藤縣各處先後斃匪一千八百餘名生擒四百六十餘名見在餘匪無多再查明賊匪由明江竄至龍州同知王淑元在潯遵地方防堵時值大雨槍礮未能施放賊卽恃眾擁入廳署王淑元親至大堂痛罵並令鄉勇家人壯丁等盡力截殺該匪等卽將

該員砍傷丟棄河內身死其子監生光頤並家丁等救護均被殺傷斃命又七月初九日賊匪竄入甯明州衙門署知州恆椿先經會同千總何光璨在板利邨堵禦趕回圍捕該匪等卽日逃至虢縣地方署都司羅起龍帶兵抵禦亦因眾寡不敵賊匪將營署及居民劫掠逃竄又賊竄至左州之馱盧代理知州保徵星赴四鄉催傳團練於十九日午刻趕回保護詎該匪已於是日擁入該州衙署又賊匪千餘人竄至萬承土州地方旋擁入該土州衙署隨卽竄至大嶺距養利州僅二十餘里查太平賊係由東省欽靈等處而來該處素爲盜匪淵藪與西省南太兩府屬犬牙相錯在在毗連上年疊經官兵擊敗輒卽回竄欽靈東突西奔去來無定見經臣等函商督臣遴派鎮將並札飭高廉道府多帶兵勇在於欽州靈山各處扼要堵截會同東省文武不分畛域協力痛剿又賀

縣之公會石塔等處前有賊匪竄至昭平之天門嶺經同知英秀等帶領兵壯追剿殺賊多名該匪繞至山後放火傷斃兵壯縣丞白良棟巡檢胡成宗外委黃俊英武舉康壽均身受多傷陣亡同知王淑元及其子王光頡縣丞白良棟巡檢胡成宗外委黃俊英武舉康壽奮勇捐軀懇恩飭部優卹上諭該參將成安等認真剿捕尙爲得力所有賀縣富川懷集連界山內逃匿餘匪恐其復出勾結仍前恣肆著林則徐向榮張必祿等督飭文武員弁實力窮搜毋使稍畱餘孽所有此次出力之文武官兵壯勇及紳民團練著該大臣查明據實保奏候朕施恩見在左右江各屬盜匪股數尙多必應乘勢分路剿洗而道途相距寫遠兵力尙單所有未到之貴州兵一千二百名湖南兵一千四百名並雲南兵二千名著該大臣等迅速催到分別險隘相機堵截至龍州被擾戕害同

知及其家屬深堪髮指該匪等既由明江竄擾該處復分擾各州營衙署及左州與萬承土州等處西奔東突來去自如著卽飛咨廣東於欽州靈山各處扼要堵截不得令遊匪互相勾結一面分飭文武帶領兵勇合力兜擒痛加勦洗逐股訪查將各頭目設法擒拏嚴堵奔竄總期擒其巢穴淨絕根株爲要將此由四百里各諭令知之○予廣西陣亡同知王淑元等祭葬世職○丙申貸雲南黑鹽井修理房倉隄岸銀○丁酉諭內閣戶部奏請飭各省查明藩庫濫支等項分別賠補一摺各省動用銀兩均由藩庫支發自應按款覈實不得任意濫行支借前因四川甘肅等省查出借墊虧短等項銀兩經該督奏明著落前任藩司賠交此外各省藩庫似此流弊亦必不免著各省督撫嚴飭見任藩司查明各前任濫支濫借等款據實奏明分別責令經手之藩司等按款賠補其

見任藩司任內濫行支借等款亦著一併據實詳報追繳賠補儘
藩司含混不報經督撫或後任藩司查出參奏卽著落見未查出
之藩司獨賠如督撫徇庇不奏卽由藩司自行奏明辦理毋得通
同隱飾以致庫款虛懸又片奏山東歷任藩司借支各款未完銀
八十九萬四千四百餘兩經該部列款指詢其無著之款卽應在
於濫行支借各員覈實賠繳著陳慶偕嚴飭該藩司迅卽逐款分
晰查覆毋再稽延○軍機大臣大學士祁寯藻等奏遵旨酌擬軍
機處章程九條一軍機處應立用印簿於用印之日滿漢章京內
輪派一員監印登簿畫押用過印封印花數目於下一次請印時
覈對一兵部送來印花數目應與用過數目詳細覈對一字寄中
遇有機密查辦事件於承旨後派章京一二員在堂上繕寫密封
呈遞發下後仍由堂上用印封交兵部領去將底彙押封封記俟

查辦事竣再行拆封登檔如有漏洩查明繕寫之章京嚴參一逐
日改定草彙應責成每日該班章京與領班章京公同檢齊焚銷
一每日明發諭旨同奏摺交內閣發鈔寄信印封夾板交兵部驛
遞速議事件交各該衙門領去應嚴飭各衙門仍遵照舊有堂諭
承領事件人員未到傳領時不得進軍機直房違者參處並嚴禁
各衙門人員不許在軍機堂並章京直房階外附近處所站立竊
聽一方略館值宿章京佩帶請印金牌接收各處文書關係較重
應責令稽查館上庫上一切事務不得曠班貽誤一軍機堂章京
直房蘇拉人等由堂司隨時稽查其方略館供事蘇拉廚役應責
令滿漢提調收掌各員認真稽查毋許任意出入滋生事端仍密
訪如有串通在外間人將補授官員等事爭先送信報喜者卽行
革役究辦一隆宗門內軍機章京直房後身另有小門空院恐供

事等於此傳遞透漏消息應請將此門封閉以昭慎重一軍機冊
檔二分一存方略館一存圓明園該章京等在內該班不及兼顧
園中直房應片行圓明園八旗值宿官兵小心守護如有應行取
用檔案開單交片提取派員領回從之○命河南布政使嚴良訓
來京以三品京堂候補○己亥調張集馨爲河南布政使以李德
爲甘肅布政使

前江蘇布政使

○庚子諭內閣前據刑部奏覆覈明誼親

供與各供不符當將明誼解任送部質訊茲據該部訊明明誼延
請辭執中治病請論按摩工夫並布施銀兩轉薦他處行醫雖在
辭執中未經改裝更名之前究屬不合其前次親供聲敘未能詳
盡亦屬含混明誼著交部嚴加議處飭令回旗聽候部議○諭前
任雲貴總督林則徐由翰林洊歷外任疊蒙 皇考簡膺疆寄宣
力有年上年勦辦雲南保山匪徒調度有方渥荷 恩施賞加太

子太保銜並賞戴花翎旋因病請假回籍朕御極之初知林則徐平素辦事認真不避嫌怨疊經降旨宣召來京嗣以廣西匪徒滋事特授爲欽差大臣頒給關防令其速赴軍營勦辦前據馳奏已由本籍啟程方冀迅埽邊氛以綏南服茲據徐繼畲馳奏該大臣沿途勞頓舊疾復發於廣東潮州途次遽爾溘逝念其力疾從戎沒於王事覽奏殊深悼惜林則徐著加恩晉加太子太傅銜照總督例賜卹歷任一切處分悉予開復應得卹典該衙門察例具奏伊子編修林汝舟文生林聰彝文童林拱樞均著俟服闋後由吏部帶領引見候朕施恩尋予祭葬諡文忠○諭前任廣西左江鎮總兵盛筠畏蕙無能又先期告病規避取巧著卽行革職與已革廣西提督閔正鳳一併交李星沅徐廣縉確查有無別項劣蹟據實具奏○諭軍機大臣等林則徐行至廣東普甯縣途次病逝其

欽差大臣關防並歷次所奉寄信諭旨各件著徐廣縉派委委員迅速齎送廣西交李星沅祇領毋稍遲誤遺漏至廉州南韶等處勦捕事務亦聞緊要徐廣縉著仍遵前旨籌辦廣東軍務以專責成將此由五百里諭令知之○諭廣西左右江各股逆匪情形見尙披猖兵貴神速不容一日疏懈李星沅周天爵未抵粵西以前著勞崇光向榮張必祿隨時妥籌堵勦前調湖南雲貴之兵計已到齊該署撫等正可乘機殲捕迅掃機槍地方責任綦重慎勿遷延觀望致有貽誤將此由五百里各諭令知之○諭粵西賊勢披猖疊竄城邑戕害官弁蹂躪地方雖經鄭祖琛等督兵追捕於平樂一帶屢獲勝仗並擒首要各匪而左右江各屬股數眾多四出搶掠勢甚蔓延李星沅自楚抵粵程途較近周天爵未到任以前已命勞崇光署理撫篆見計湖南貴州雲南等省所調官兵已有

六千名次第可到該大臣卽會同該署撫及向榮張必祿等悉心籌商督飭文武相機兜勦務期擒渠殲醜淨絕根株勿致竄逸旬結方爲不負委任其鄭祖琛前在巡撫任內周旋粉飾各情已革提督閔正鳳畏葸無能及該省地方失事官弁率多逃避捏飾之處疊經寄諭林則徐認真訪查見已諭令徐廣縉將林則徐所奉諭旨各件檢齊封固派員齎至粵西李星沅接收後卽當逐加訪查務令水落石出據實覆奏斷不可稍有不實不盡將此由五百里各諭令知之○直隸總督訥爾經額奏遵查天津縣關廂劫案請將署知縣陳政典撤任勒緝得旨經朕詢問始行察訪要爾地方大吏何爲汝貌似老成心實因循以後務須惕勵慎勉爲之○以周天爵署廣西巡撫前漕運總督未到任前以布政使勞崇光署理○命前任兩江總督李星沅爲欽差大臣馳赴廣西會同署巡撫

周天爵勞崇光提督向榮張必祿剿賊○癸卯協辦大學士陝甘總督琦善奏甯夏駐防滿營應需明歲兵糧不敷估支請於從前部議採買一萬五千石外添買糧二萬七千七百石以資兵食允之○甲辰四川總督徐澤醇奏鹽務積弊酌擬章程一稽查井竈透漏一責成關隘盤查一酌加鹽斤一清釐邊岸一勒繳殘引一嚴緝私販一課歸代商完納一裁革冗費又奏查辦茶務彌欠杜弊均下部議行○江南河道總督楊以增奏覆周天爵所稱海口刷塌查無其事得旨認真確勘不可受屬員蒙混○以張熙宇爲甘肅按察使由福建興泉永道遷○乙巳諭軍機大臣等前因兩粵用兵及當年支放各項需費浩繁戶部請開籌餉事例朕以十數年來水旱河工業經屢次捐輸思與吾民休息御極之初卽停止各項捐例以冀培養閭閻元氣而度支告絀又不能不先事豫籌宵旰榮

懷時深焦灼因思各省藩庫報撥之款除部臣隨時籌撥外其畱
支待用及雜款各項銀兩中有可酌量暫緩及應裁應減者若使
各就本省情形認真通盤籌畫亦可移緩濟急挹彼注茲部庫藩
庫均爲一體部臣籌之於內疆臣籌之於外協力同心庶克有濟
該督撫等身受重恩當國家經費短絀之時定亦同深憂慮著督
飭藩運兩司及關道迅速籌覈於例撥諸款外每省或四五十萬
或二三十萬酌定數目一面奏聞一面委員起解近京各省於封
印前奏到遠省於明年開印前奏到如此則部庫可資周轉亦何
必遽議開捐朕之本懷諒中外諸臣必能共喻也其有歷年積欠
見已催繳在庫與清查案內追繳贖攤屆限應完之項一併詳查
開單呈覽並飭迅速委解毋稍遲延將此各諭令知之○准西
陵守護兵丁緩扣借支銀○丙午劉韻珂以病免調裕泰爲閩浙

總督未到任前以福建巡撫徐繼畬署理調程喬采爲湖廣總督未到任前以湖北巡撫龔裕署理以吳文鎔爲雲貴總督常大涇爲浙江巡撫梁星源爲湖北布政使調春熙爲雲南按察使以陳之驥爲湖南按察使

由直隸清河道遷

○丁未冬至祀天於圓丘○

賞八旗兵丁一月錢糧○戊申諭內閣徐廣縉葉名琛馳奏勦辦

翁源境內竄入各匪大獲勝仗一摺廣東賊匪自在石角墟擊敗之後復分股竄入翁源縣屬各墟計有四千餘人經該督撫等派委文武員弁遴選精銳兵勇合力圍剿於十月二十一日在雪廟墩遇賊迎撲抗拒經兵勇登時擊退該匪竄入樹林冀圖設伏詎誘我兵排列五陣分路前進賊匪三千餘人亦分三隊抵禦疊經官兵奮力夾攻左右環擊自辰至申殲斃賊匪三百七十六名生擒一百六十七名受傷倒斃者一百六十八名各路捕獲者三百

零二名並驗明殲斃頭目十二名訊明生擒頭目八名該匪橫行肆擾罪不容誅此次大加擒剿洵足寒賊膽而快人心惟賊股眾多難保不潰而復聚該督撫等務當督飭文武員弁趁此聲威益加奮勇殲滅羣醜力淨根株切勿以偶獲勝仗稍存大意另片奏籌撥經費等語著准其暫撥粵海關稅銀二十萬兩以資要需○諭軍機大臣等鄭祖琛向榮馳奏生擒擁入遷江縣城首匪並殲擒來賓案內劫獄戕官首夥各犯見經分路進剿一摺又片奏藤縣拒捕傷官及蒼梧縣搶擾各匪亦經擒獲並殲斃多名等語廣西各屬盜匪股數眾多見據奏稱擁入遷江縣城之首匪鍾亞春及來賓案內起意劫獄戕弁之首匪盧發申李四一併擒獲而各股著名兇渠難免分投竄逸見在向榮張必祿勞崇光業已到粵李星沅周天爵先後計可馳抵該省所調各省官兵亦可陸續到

齊正當乘機追勦一鼓殲除勿任奔竄句結方免蔓延貽患李星沅周天爵未到以前勞崇光等尤當及時盡心籌勦不可稍存觀望將此由四百里各諭令知之○己酉追封孝德皇后父原任太僕寺卿富泰爲三等公母宗室氏爲公妻一品夫人○庚戌諭內閣惠親王係朕之叔前經降旨於叩拜禮節加恩優免因思諭旨奏章內與諸王一律書名朕心仍有未安嗣後除朝祭大典外其餘諭旨並各衙門奏摺止書王號毋庸書名以示朕敬長親親有加無已至意○諭琦善奏河北番回及循化撒拉悔罪投誠縛獻各賊審明辦理一摺另片奏在事出力人員可否保奏等語番回擾害良民頻年肆行搶劫自應加以懲辦該督帶兵巡閱先將潛踞內地之雍沙番及黑城撒拉回匪次第勦除見在黃喀窪番族悔懼該管喇嘛率領頭目人等縛獻賊犯一百數十名均經分

別審辦西甯東路河北一帶番回及循化八工撒拉均已投誠見
飭提鎮等撤兵歸伍辦理尙爲迅速其黑城地方移駐營汛之處
著卽妥議具奏此次在事出力文武員弁著該督擇其勞績尤著
者分別保奏候朕施恩毋許冒濫○諭軍機大臣等有人奏本年
入秋以來海盜猖獗大船中礮械具備每遇商船劫人勒贖按船
隻之大小貨物之多寡勒銀自數百兩至一二千兩不等計八月
中劫案多起均在復州錦州地方登州商船亦有被劫勒贖之事
天津海口一帶毗連奉天山東爲商船往來要地若如所奏盜賊
肆行無忌商民望而裹足非嚴拏懲治必致釀成後患著奕興訥
爾經額陳慶偕督飭地方文武無分畛域認真巡緝合力殲擒其
摺內所指各案盜匪務期設法購獲以淨根株毋得稍有諱飾原
摺均著鈔給閱看將此各諭令知之○癸丑諭內閣田雨公奏陳

用人宜慎三條朕詳加披覽其所言用人常經尙不爲無見至倭
仁以三品卿給予副都統職銜作爲葉爾羌幫辦大臣邊疆大臣
要任令其敷歷諳練並非投閒置散而該少卿以爲用違其才若
如所奏則外任皆爲左遷而新疆換班者尤爲擯斥豈識國家文
武兼資內外並重之微意乎孫瑞珍年近七旬精力尙健於戶部
事務本非素習然數月以來朕觀其孜孜講求無時稍懈該少卿
稱其辦公竭蹶物議紛滋經軍機大臣傳旨詢問僅以傳聞嘲誚
之詞回奏其傳聞數端又皆同堂公議並非孫瑞珍一人之私見
朕親政伊始耳目未廣用人惟知公正從不稍存成見九卿科道
拾遺補闕朕所樂聞然黜陟大權朕自持之田雨公此奏殊屬冒
昧著傳旨申飭嗣後有言責諸臣仍當遇事直陳無隱不得因有
此旨遂緘默不言負朕虛衷納諫之本意也○大理寺少卿田雨

公奏新授道員呂佺孫知府孫毓澐未及到任均擢臬司用人太驟恐閱歷未深無以收駕輕就熟之效得旨朕之破格施恩乃振興之權汝所言乃用人之常經所奏不爲無見然二人究有何不堪外任者何不明言又奏外官有聲名平常經督撫科道參奏者驗之不爽當經斥罷若畱京補用恐黠者冀死灰之然劣者爲棧豆之戀批此又何不明指其人朕知之汝所奏意必在萬貢珍嚴良訓二人然二人亦堪內用者○免雲南銅廠民欠無著工本銀○甲寅諭內閣朕聞各省州縣虧那庫項往往藉流攤名目列入交代積弊相沿遂成鉅款前於清查案內疊經王大臣會同戶部議立章程禁止流攤濫支等弊並嚴飭交代盤查認真稽覈第恐奉行日久視爲具文不肖州縣復逞其侵漁故習上司不加查察甚或有意徇隱舊欠未補新虧又增國家度支有常豈容如此耗

蠶著各督撫府尹於所屬各州縣交代覈算時如查有分年流攤名目或虛報工程或藉稱賠累展轉攤認以致庫款虛懸卽行徹底根究嚴參懲辦庶侵虧之弊可杜彌縫之習漸除儻仍前徇庇經朕查出或被入參奏定將該督撫等一併重懲不貸將此通諭知之○諭近來各省盜賊橫行劫案累累甚至湖南會匪滋擾兩粵賊勢蔓延推原其故皆由保甲之法不行以致莠民無所忌憚本年春間曾經降旨通諭各直省督撫嚴飭該管州縣力復舊章實心辦理迄今已逾半載各省大吏並未將見辦情形據實覆奏是直以通諭爲虛文視保甲爲故事無怪各省搶劫之案層見疊出毫無儆畏也盜匪一日不除閭閻一日不靖安民鋤暴時廩朕懷各督撫府尹身任疆圉宜如何勤思綏輯著卽遵照前奉諭旨各將地方見辦章程據實具奏州縣中認真奉行著有成效眾所

其知者卽應加以鼓勵其奉行不力或虛詞欺飾及藉端擾累者亦卽指名嚴參懲辦以肅吏治而清盜源毋得以空言覆奏致負法美意徒成具文將此通諭知之○乙卯鄭祖琛向榮奏廣西土匪竄擾武緣賓州慶遠等處經臣榮親督官兵馳往慶遠一帶探蹤進剿賊眾約有二千餘人在龍門司之索潭墟盤踞滋擾臣榮慮賊聞官兵將至先期逃竄必須乘其不備立時掩捕方可聚殲當卽率將弁飛馳進剿殲斃賊匪數百名乘勝縱火圍攻該匪被傷燒斃及落崖身死者無數生擒數十名奪獲槍礮器械多件武緣賓州之匪亦經該處文武督率兵練斬獲甚多見在督飭各軍乘勝進攻以期迅速蒞事提臣張必祿行抵潯州病故所帶三千人仍畱廣西剿賊上諭內閣向榮甫經到粵卽能身先士卒激勵將弁實屬忠勇可嘉其武緣賓州等處亦經該處文武督率兵

勇團練齊心勦力斬獲甚多均堪嘉獎此次出力員弁及紳民團練人等著李星沅周天爵勞崇光向榮等查明保奏候朕施恩見在兵威大振賊勢已蹙所調鄰省官兵計亦次第到齊正可乘機分路進剿悉數殲除勿畱餘孽候補提督張必祿見雖病故其所帶弁丁等三千餘人想可得力均著畱於軍營交李星沅等酌量差遣委用○熱河都統惟勤奏報十月分糧價得旨飭查盜匪之事豈盡忘耶何多時不見覆奏抑亦另有別情著速行查訪具奏斷不可希圖含混豈以按月奏報照例數語遂爲克盡厥職懷之○丙辰兩廣總督徐廣縉奏遵覆周天爵條陳洋務情形得旨卿智深勇沈視國如家所奏各情形甚當朕聞汝今秋偶有微疴此時佳善否○贈故候補提督張必祿太子太保子祭葬諡武壯○是月免直隸安州等七州縣積澇窪地額賦并緩征節年旗民糧

租賑浙江仁和等十縣災民口糧山西薩拉齊托克托城二廳水災電災口糧并給修屋費貸湖南澧州安鄉縣貧民籽種蠲緩浙江海甯四十九州縣衛湖南澧州等十一州縣衛水災山西薩拉齊廳太原縣電災水災新舊額賦緩徵江蘇太倉等七十州廳縣漕糧額賦兩淮富安等十四場被水竈戶欠款展緩河南睢州等四十八州縣水災電災與河占沙壓地節年銀米及民借籽種口糧倉穀

十二月戊午朔諭軍機大臣等據都察院奏廣西生員洗激清等呈訴逆匪橫行等情廣西土匪肆擾已久地方塗炭民不聊生甚至州縣向賊講和冀圖苟免或竟被擄勒贖實出情理之外覽奏深堪憤恨著李星沅周天爵勞崇光等按照該紳士等所控各情將該處縱賊養盜及庸懦無恥各員確切查明從重究辦被賊各

區尤當妥爲招撫以安民心又據杜受田呈遞奏單一件所開各屬賊首及扼要地方應如何查拏堵禦其募勇諸說是否可期得力武舉彭姓並候補同知張敬修馬平縣拔貢銀沆是否可資差委之處均著李星沅等按照單內各條詳加採擇體察情形妥爲辦理此二件內所指盜首名號必應全數殲擒不可令其漏網至張家祥乃前經投誠之賊若任其反覆句結恐貽後患見徐廣縉奏到亦慮及此業經移咨廣西卽著嚴密查辦毋致墮其術中又據徐廣縉奏署龍憑營都司譚永德於匪徒逼近州境時將關防軍裝等件交該管把總看管先自逃避等語似此喪心無恥深堪痛恨著一併確查實情從嚴治罪李星沅等經朕畀以重任除暴安良責無旁貸務當同心協力因地因人相機調度俾萑苻早靖士民樂業釋朕南顧之憂方爲不負委任都察院摺紳士呈詞外

黏鈔一本並杜受田奏單均著鈔給閱看將此由四百里各諭令知之○諭陸建瀛奏馳往勘籌海口三牘等語據稱見在清高於黃回空漕船得以暢行正可乘勢刷黃無失機會至海口攔沙是否壩通草壩偏溜是否得力並添塘避牘較量水面高下是否合宜均著該督會同楊以增仍遵前旨親往確切勘明悉心妥議分別具奏將此諭令知之○諭琦善奏遵旨覆陳勦辦雍沙番賊情形一摺另片奏見訊通事各供及蒙古近日情形各等語雍沙番賊歷年搶劫內地民人既經該督查明均有報案可憑並見訊各供確鑿可據自應如此辦理惟該處蒙番雜處駕馭撫綏在在均關緊要該督務當隨地隨時豫籌妥辦總期法立於無弊患消於未萌儻經此次勦辦之後及致該處蒙古番族互啟猜疑別滋事端朕惟該督是問懷之愼之將此諭令知之○己未諭內閣吏部

寺衙門會議廣西學政孫鏞鳴陳奏四條一摺州縣爲親民之官自應各守本任俾得盡心民事近日紛紛調署雖云爲缺擇人恐不免爲人擇缺一存調劑之見便開奔競之風此種積習於官方大有關繫至佐雜微員遽令署理正印尤易貽誤地方著各直省督撫力加整頓破除積習凡實缺州縣等官不得無故調署亦不得令佐雜濫署正印其有實係人地相需必須調署及委員者務宜各按定例秉公辦理毋稍瞻徇以杜夤緣而肅吏治將此通諭知之○諭軍機大臣等前據哈勒吉那奏稱琦善帶兵出卡將海蘭插帳雍沙番子殲斃淨盡奪獲牲畜擊打番帳等情當經諭令琦善明白回奏並飭哈勒吉那查明覆奏嗣據琦善疊次奏陳剿辦情形與哈勒吉那覆奏該管郡王呈訴各情節迥不相符事關控馭蒙番辦理稍有失宜易致藉口起釁薩迎阿見已有旨諭令

回京著卽迅速馳赴西甯沿途密訪並將該郡王恭木楚克集克默特並台吉集克默特納木加立多爾濟端多布旺扎勒等傳齊悉心查問該番族住牧該處原委及見在因何遷延未回原牧其戕官劫搶各案是否積年舊案抑係近時滋擾琦善辦理此事時其巡邊摺內未經先行奏明是否因剿除柯柯烏蘇賊匪未能得手移兵雍沙掩其不備誅戮過當以致波及蒙古濫殺無辜且牲畜器械奪獲者是否皆係賊物通其擊斃番族若干蒙古人等若干所訊各供是否確鑿有無刑求威逼情事其剿辦黑城撒拉回匪及黃喀窪獻賊投誠等情是否所奏皆實此次辦理之後見在蒙番情形如何琦善等摺內所陳各節均著逐一訪查據實具奏薩迎阿久任邊帥於地方綏輯事宜諒能深思熟計弭患未然斷不至豫存成見遷就了事務當秉公持平剖析是非如琦善有辦

理過當及哈勒吉那偏聽飾詞之處卽應分別參奏不得稍有
實不盡至蒙番如何經久相安不至別生枝節一併通籌妥議奏
聞琦善哈勒吉那前後各摺件並單均著發交薩迎阿閱看將此
由四百里諭令知之○御史長秀奏請湖南營制仿照浙江貴州
廣西三省之例鎮將以下就近由巡撫節制下部議從之○庚申
以托倫布爲內閣學士由太僕寺卿遷○辛酉諭內閣嗣後除朝祭大典
外內廷行走班次及各衙門請派差使單內惇郡王奕諒著在恭
親王奕訢之前○諭吏部奏尋常捐輸議敘請酌定限制以杜冒
濫一摺各省官紳商民急公報效捐輸銀穀及捐辦各項工程該
督撫覈實具題俱准分別給予議敘乃近年各省尋常捐輸每將
歷年久遠之案彙請議敘其間官易數任稽覈稍疏難保無蒙混
冒濫情弊自應予以限制嗣後各省尋常捐輸著自事竣之日起

統限一年內由該督撫查明嚴實具題如實有不能依限者准其咨部展限一年辦理如再逾限卽毋庸議並著吏部於具題到部之日趕緊覈辦奉有諭旨卽咨行該省督撫速飭地方官按名傳知各該捐生俾得早邀獎敘不得任令吏胥人等抑勒稽延致滋流弊○丙寅諭軍機大臣等前因琦善疊次奏陳勦辦雍沙番子情形與哈勒吉那覆奏該管郡王呈訴各情形不符業經降旨令薩迎阿於回京時馳赴該處密查矣茲又有人奏稱琦善到任後屢有番賊搶掠重案該督並未嚴飭勦除至本年七月間始奏請巡閱時帶兵追捕於時番賊搶劫頻聞該督始猶移兵避賊迫賊眾抗拒不得已調兵會勦乃於番賊逃匿之後將熟番妄行殺戮並嚴拷被獲熟番偏令供認勾結其晚間開礮轟斃撒拉回子情形尤爲慘酷若如所奏該督濫殺無辜貪功喜事於邊務大有關

繫著薩迎阿於接奉前旨馳往密查之際按照摺內所指各情一併嚴密訪查據實具奏斷不准稍有隱飾諒薩迎阿必不肯代人受過也原摺著鈔給閱看將此由四百里諭令知之○頒 宣宗成皇帝御製詩文餘集賜王大臣暨內廷翰林各省督撫○丁卯戶部議覆山西巡撫兆那蘇圖奏變通河東鹽務章程一復長商以專責成一裁浮費以歸節省一禁擡池價以杜居奇一酌減銷價以節虛糜一暫停活引以紓商力一河工經費照時估以錢易銀一按引加斤以濟不足一商鹽加價以裕公項一嚴緝私販以免滯銷一三場均運以裕池產應如所請飭令覈實辦理從之○戊辰諭內閣徐廣縉葉名琛馳奏佛岡英德兩處勦匪疊獲勝仗並廉州疊次殲擒巨匪又覆奏兩省交界嚴防合剿各一招廣東南韶一帶匪徒前在翁源縣境受創後餘匪尙多經該督撫等督

率文武於十一月初二日在佛岡廳之二渡水地方砍斃執旗頭目五名生擒頭目二名轟斃一百六十五名又於初九日在英德縣之望樓坪等處斃賊二百八十六名生擒十五名見在匪徒疊次潰竄入山官兵逼近巢穴葉名琛親督戎行務當嚴飭弁兵一鼓作氣分路進攻以期搜捕淨盡尤須據險持重步步爲營不可稍存大意至廉州一帶匪徒以方晚爲巨魁見經鄉民應募擒獻正法並將廣西匪首蘇三誘獲殲斃又靈山縣與廣西宣化接壤匪首陶安仁嘯聚多人經該縣調帶兵練由紳士引入巢穴分路夾攻殲斃百餘名殺斃三百餘名並將匪首陶安仁轟斃賊巢盡行焚毀該府屬舉行圍練頗爲有效又署欽州呂詮訪獲通賊助逆之土匪七名悉數正法辦理亦頗得要其方晚餘匪劉八一股及陶安仁夥匪黃大等仍著分飭迅速剿辦所有南韶一帶兩次

剿匪及廉州殲擒巨匪之出力員弁紳勇俱著查明酌量保奏兩
粵接壤之區肇慶一府尤爲西江往來門戶其餘各屬多與廣西
毗連見值賊匪被創奔竄該督撫等惟當督飭文武紳勇於各要
隘處所合力兜剿毋任免脫總期一律肅清迅殲羣醜以慰朕望
○諭前因廣西各屬被賊蹂躪徵調頻仍特降旨令林則徐查明
被擾及官兵經過地方將本年應徵錢糧分別蠲免緩徵見據鄭
祖琛奏請將歉收及被擾地方酌量分數應徵應緩自係在奉
諭旨以前朕軫恤民艱惟恐澤不下逮致吾民顛沛失所著李星
沅周天爵勞崇光等遵照前旨迅速查明鄭祖琛所奏情形是否
分別緩徵即可稍紓民困如兵燹之後州縣中有全境被擾力難
輸將者卽量予豁免朕亦不惜立沛恩膏俾吾民共登衽席李星
沅等務卽悉心體察詳細查明據實具奏毋稍延緩○諭軍機大

臣等據徐廣縉奏通籌廣西勦辦事宜並武緣縣兵練大獲勝仗各一摺廣西平樂柳州一帶白陳亞潰就擒漸見安戢惟潯州慶遠思恩等府賊數眾多兵力較單自應擇要併力攻圍以期迅速肅事李星沅計已行抵軍營著卽與周天爵勞崇光向榮體察各郡形勢密訪盜賊淵藪悉心籌畫合力攻擊其調到各兵道路不熟恐羣匪乘間竄逸或設伏抗拒互相勾連亦須酌籌妥爲布置總期兵多力厚將賊匪屯聚最多之處先行掃除他股畏懾軍威定能望風解散兵機制勝全在該大臣等因時因地調度得宜朕亦不爲遙制也另片奏武緣剿賊兵練得力前據鄭祖琛奏到已降旨令該大臣等查明出力兵勇據實奏請鼓勵此次徐廣縉所奏得獲勝仗全賴團練之力與鄭祖琛摺內開列姓名互有詳略著該大臣等迅速查明覈實保奏候朕施恩其各郡團練有能似

此奮勇出力者該大臣等一併查明奏獎至兩粵交界處所尤須嚴密督飭防守毋令盜匪此拏彼竄是爲至要徐廣縉各摺均著鈔給閱看將此由四百里諭令知之○廣西巡撫鄭祖琛奏請酌增兵丁鹽菜及壯勇工食從之○己巳諭內閣朕恭讀 皇祖仁宗睿皇帝諭旨申明 世宗憲皇帝 高宗純皇帝成訓嚴禁朝臣與諸王往來交接杜漸防微意深且遠朕親政以來諸王暨內外大臣率皆承事 先朝定知恪守憲章靖其爾位第恐法制禁令習久漸忘用特重申儆諭嗣後除奉旨會辦事件及因公接見外諸王與在廷大小臣工各宜懍遵 聖訓引嫌自重固不得私信交通致啟賄託之漸雖文墨細事亦不得有唱和之風其封疆大吏斷不准私行干謁信札往還 在諸王守身謹慎恩眷克承而諸臣循分從公夙夜無忝庶期朝綱整肅臣職交修以仰副 列

祖諄諄訓誡之至意朕於諸王大臣有厚望焉其令宗人府各部院旗務衙門並各督撫將軍等衙門各錄一通敬謹懸挂用資儆惕○諭陸建瀛奏請崇正學以黜邪教等語近來邪教流傳蔓延各省始不過燒香斂錢煽惑愚民漸至聚眾滋事總因地方官平日化導無方民間父兄師長又不能隨時訓迪俾領蒙服教畏刑不至爲邪說所惑我皇考曾命儒臣恭闡聖諭廣訓黜異端以崇正學一條編撰四言韻文頒行各省啟發愚氓朕思性理諸書均爲導民正軌著各直省督撫會同各該學政轉飭地方官及各學教官於書院家塾教授生徒均令以御纂性理精義聖諭廣訓爲課讀講習之要使之家喻戶曉禮義廉恥油然而生斯邪教不禁而自化經正民興庶收實效各該督撫等務當實力奉行毋得視爲迂闊具文日久生懈則風俗人心蒸蒸日上朕實有

厚望焉將此通諭知之○諭前據刑部奏湖南民鄭添朗毆死小
功服叔鄭正煥一案內閣照例票擬雙籤朕詳加披閱該犯之小
功服叔鄭正煥行竊雖在昏夜而被毆不止一傷豈有負痛不言
絕無聲聞相知之理是該犯罔知倫紀肆意疊毆斷難倖逃法網
昨已將該犯依律斬決矣因思內外問刑衙門辦理服制命案往
往避重就輕此等積習實堪痛恨在尋常闕毆案內情傷稍重秋
審時尚且酌量加嚴擬以情實予勾惟服制之案倫紀攸關轉得
以並非有心干犯一語爲救生不救死之計豈國家明刑弼教之
道乎嗣後刑部及各省督撫於服制命案務須悉心研鞫不可意
存開脫轉令鄉曲愚氓得啟干名犯義之漸亦不得因有此旨刻
意周內於實在可原情節不爲研究聲紋致滋冤抑總期毋枉毋
縱情法兩平用昭明慎用刑之意將此通諭知之○諭軍機大臣

等前因俄羅斯國懇請於伊犁等處通商令該將軍等籌議後由理藩院覈定咨覆該國茲據該國薩納特衙門來咨稱遵照派員於明春啟程來赴伊犁會同議定等語此事曾由薩迎阿會同奕山擬議見在薩迎阿來京奕山接任將軍於原議曲折自能深悉著將見在該國來咨鈔給閱看事關邊疆貿易奕山務必先事籌度周詳所有伊犁塔爾巴哈台二處添設貿易一切事宜前據奏稱礙難照恰克圖事例所見甚是其進卡出卡人數與牲畜貨物多寡撥兵接護並此外有無應行籌及之處著奕山等查照前奉諭旨並廣諮博採逐細斟酌妥善臨時公同商推定立規條以期垂之久遠彼此相安有利無弊至喀什噶爾毋庸通商一層前次理藩院咨文業將種種窒礙並無利益情形委曲開導今該國來文仍欲於此處添設喀什噶爾距內地寫遠商販稀少不敷易換

本係實在情形但恐該國官員於到伊犁會議時仍復申請無已
奕山等務必曲爲譬說使其心折服自不至再有曉瀆此次理藩
院咨覆該國文底亦著鈔給閱看此事關繫綦重奕山等加意慎
重於國體邊防必須面面顧到斷不可草率定議致貽後患也慎
之將此諭令知之○兩江總督陸建瀛奏見辦緝捕盜賊章程及
查無淮安府喫俸名目並覈實保甲以清邪教之萌得旨嚴禁於
已成之後曷若暗消於未肆之初全在地方大吏認真稽覈平素
於屬員某爲何等才於何缺相宜心存默識方能收指臂之效尤
在身爲表率務實誠實勿蹈欺僞於奸徒小犯必懲於良吏微功
必錄則上行下效返本還淳庶幾消患於未萌又奏淮南鹽務仿
照准北章程於儀徵設立棧房令商人請運一引卽納一引正雜
額課並將錢糧實成兩淮緝私責成各岸下部知之○庚午諭內

閩陸建瀛傅繩勛奏請將白糧照案海運一摺江蘇蘇州松江常州三府及太倉州應徵道光三十年白糧正耗米七萬二千石零著准其援照二十六年成案由海運赴天津以期迅速其天津刺船等費及沙船水腳耗米運費仍照成案由各津貼款內支用○賞 幕陵值班官員兵丁銀○辛未諭內閣前因江西巡撫陳阡有被參款蹟諭學政張芾密查茲據覆奏查明陳阡在吉安府任內並無勒增布稅之事其因鬧漕槍斃匪徒一案亦尚無消弭情事惟與升任參將穆齊賢通判古連魁廬陵縣知縣陳儁曾喚女優進署演唱非尋常燕會可比實屬有玷官箴陳阡著卽革職聽候查辦穆齊賢古連魁陳儁著一併解任交新任巡撫陸應穀分別咨提據實查辦此外尚有何項劣蹟從嚴參辦毋稍瞻徇○諭徐澤醇奏辦理西昌等州縣災務情形一摺四川西昌縣及會理

州屬披沙汎等處地震被災經該地方官紳捐辦工賑俾災民得以復業城工等項亦次第興修署會理州知州喬用遴先行捐廉散給口食修費尙知急公所有西昌會理兩處捐輸經費及在事出力官紳人等著該督酌保請獎毋許冒濫○諭徐澤醇蘇布通阿奏夷匪出巢搶擾疊經官兵轟擊遁回一摺四川馬邊屏山等廳縣近有夷匪滋擾經該督等嚴飭文武員弁帶兵追捕先後轟斃並生擒夷匪多名均經訊明就地正法見在夷匪業已遁回仍籌酌抽兵練分隊巡邏辦理尙屬周妥惟夷性靡常難保不復出滋事見值冬春之際該督等仍當嚴飭地方文武隨時密訪毋稍疏懈○勞崇光向榮奏廣西慶遠一帶賊匪自索潭受創之後竄至八旺附近地方恃險抗拒官軍奮勇攻擊殲斃三百餘名餘匪復竄忻城土縣之木棉羅墨等處我兵連追三日及之於陶鄧墟

痛加殲洗又追至覃邨生擒賊匪百數十名復經各處兵練分路堵截殲擒多名並將陳亞潰之父陳勝卽矮古二一併擒獲上諭內閣見在慶遠餘匪無多賊勢窮蹙已極正可乘此嚴密搜捕務期悉數殲除不畱餘孽至潯州南甯等屬仍著勞崇光向榮飭派文武分投剿捕以期早就肅清○諭軍機大臣等向榮馳奏敬陳管見一摺廣西土匪滋擾所陳見在辦理情形不爲無見該提督自抵粵後身先士卒屢立戰功殊堪嘉尚至請將見任陝甘總督琦善飭赴粵西會同商辦等語行軍命將朕心自有權衡豈容妄參末議所請著不准行李星沅周天爵等均經朕特派前往廣西會同勦辦計該提督見已接奉諭旨務當同心協力盪滌賊氛果能認真勦捕剋期蕺事朕必立加恩獎儻始勤終怠致賊匪日就蔓延該提督亦難辭重咎懍之勉之此旨並著李星沅周天爵

勞崇光等公同閱看將此諭令知之○以陸應穀爲江西巡撫

天府府尹遷

未到任前以布政使陸元烜暫署○壬申諭內閣本日召

見安徽蕪采營遊擊薩齡阿朕觀其人雖粗率詢之於營伍事務尙屬去得惟伊謝恩時並未奏清語追問及眼前清語亦茫然不知且奏稱自幼並未學習殊堪詫異我朝根本以清語騎射爲首務薩齡阿實屬旗人中之敗類伊本由健銳營出身著仍回健銳營當差賞給四品頂帶令伊專心學習清語騎射毋任蹈外省惡習著載銓等畱心察看如果自知奮勉俟有何項章京缺出酌量補用○以張亮基兼署雲貴總督

由雲南巡撫兼署

○賞 昌陵值班官

員兵丁銀○癸酉諭軍機大臣等御史湯雲松奏籌議鹽斤加價

一摺淮南改票新章浮費盡裁在該督爲恤商便民通籌立法自

未便先設公費名目開濫觴之漸惟據稱捆鹽口岸以及經過關

津引地在在皆須實力稽查見在巡緝員弁自必酌給薪水其款究何從支發該督等必有成算應否如該御史所奏另議於鹽斤加價以資公費著陸建瀛悉心體察並嚴定分年巡緝覈計功過章程一併妥議具奏原摺著鈔給閱看將此諭令知之尋奏緝私本有公費鹽斤未便加價報聞○劉韻珂等奏神光寺洋人業已搬遷實無勒買民房起造樓屋及釘塞礮眼之事並委員勸諭各商不准再租洋船護送查明幼孩並非洋人槍傷奏入命裕泰確查具奏○熱河都統維勤奏遵拏朝陽縣匪徒江隴潭等審訊得旨嚴行究辦不可俾兇徒漏網爾到任時日向淺斷不准回護亦不准稍示寬柔若罔知認真根究朕必立加重譴○甲戌諭軍機大臣等裕泰龔裕奏楚岸辦理鹽務情形等語准鹺引地以兩湖爲最廣惟湖北之宜昌襄陽湖南之衡永寶慶向因准鹽成本過

重積不能消遂爲鄰私侵灌之地自須設法分銷據稱江省見擬將鹽包交鹽道轉發已據該道議詳宜昌衡州二府仍令通判赴省領運襄陽則擬令樊城商棧認運各商照前辦理或照運宜章程改爲官運各情著陸建瀛量其時地所宜乘此鹽價平減應如何使官鹽源源接濟不致私鹽仍前侵占引地官吏人等又添浮費立法之初必期周密毋令日久更蹈積習至所稱江省應嚴查夾帶一節自屬喫緊要務該督自必防制周詳其悉心籌計妥議具奏原片著鈔給閱看將此諭令知之○乙亥諭軍機大臣等李星沅奏馳抵粵西暫住柳州會籌剿賊並就見在情形約舉大略六條廣西賊匪見經勞崇光向榮督飭弁兵連獲勝仗柳州慶遠諸賊殲除殆盡而左右江各屬勢尙蔓延所有潯州府之大黃江桂平之金田邕及附近平南鬱林等處賊蹤出沒人數甚多該大

臣見駐柳州策應與勞崇光向榮互爲聲援計周天爵亦將馳抵軍營厚集兵力分路兜捕當不難迅掃機槍著該大臣等因地制宜於所擬六條斟酌妥辦朕亦不爲遙制總期迅速蕆事不致糜餉勞師方爲不負委任已革巡撫鄭祖琛旣據稱熟悉情形著交李星沅差遣委用其應行查辦之處仍著嚴密確訪據實奏聞毋稍徇隱雲南遊擊呂飛鵬都司李廷楷施嘉祥貴州遊擊任大貴何澤都司彭長春已令雲貴總督飭令兼程赴粵隨同勦辦廣東潮州鎮官兵前經選定一千名亦准其咨調粵西以備調遣頃據徐廣縉奏稱廣西署桂平縣知縣李孟羣係首先督同練長將賊首陳亞潰拏獲鄭祖琛前奏亦稱密札顧元凱李孟羣等督捕著李星沅再行確查如實係李孟羣首先督拏卽據實保舉候朕施恩其未獲夥匪鄭廷威仍著速行捕擒毋任漏網徐廣縉奏摺著

鈔給閱看將此由四百里諭令知之○以勦辦廣西橫州賊匪復勝提督向榮下部優敘○戊寅准廣東南海等六縣暫停加徵溢坦租銀○己卯諭軍機大臣等勞崇光向榮馳奏進勦桂平金田會匪情形一摺另片奏勦捕思恩等縣匪犯及殲擒首匪各等語廣西桂平縣屬之金田邨有會匪屯聚經署總兵周鳳岐等督率兵勇分投防勦並派副將李殿元等馳往堵禦該署總兵等宜如何設法布置奮勇爭先乃在思旺墟追擊被賊分股回撲官兵失利以致副將大員陣亡文武員弁被害雖因賊勢猖獗亦由調度無方遂致墮賊術中深堪憤恨著李星沅等查明失機文武員弁據實嚴參向榮勦辦橫州等處賊匪屢獲勝仗見據奏稱督帶官兵馳往桂平督同周鳳岐及在事文武激勵兵勇合力兜擒自當相度地勢熟審賊情將此股逆匪剋日殲除至該匪詭裝壯練涵

入我軍尤當豫爲設防勿致售其奸計所有思恩羅城及昭平等縣擒捕賊匪多名均分別從嚴辦理出力之文武員弁查明保奏未獲之賊首方晚要犯鄭廷威等仍著設法搜捕無使稽誅計此時周天爵當已抵粵該大臣等雖分駐各處聲息相通務當共殫心力運籌決勝遇有奏報著該大臣及巡撫提督一併列銜會奏以歸確實而免紛歧將此由五百里各諭令知之○禮部議奏次年上元服色得旨正月十三日朕御龍袍貂珕王公大臣官員穿蟒袍補珕進壇時穿蟒袍貂珕爾部所擬實屬錯誤至擬請閱視祝版御龍珕尤屬大謬○予廣西陣亡副將伊克坦布巡檢張鏞祭葬世職○庚辰諭內閣惠豐等奏議擬服色錯謬請交部議處等語禮部尙書惠豐侍郎瑞麟均兼管太常寺事務侍郎聯順在內廷行走遇有舉行典禮時常隨從均應熟諳禮節何以於奏摺

錯謬之處並未看出惠豐聯順瑞麟均著交部議處尙書何汝霖署侍郎孫葆元侍郎曾國藩均著加恩改爲交部察議所有承辦司員著查取職名交部議處○諭軍機大臣等前因周天爵有海口坍陷可以乘機築壩攻刷清江三牖水係平流可以廢牖等議論陸建瀛楊以增查勘情形具奏茲據勘明海口塌寬係在兩岸河崖潮汐往來礙難於溜猛沙浮之處強爲偏濶並據確量各牖壩水勢遞高節節鉗束實非平水三牖不可議廢各等語披覽所呈圖說形勢顯然自毋庸驟議紛更惟所稱宜於上游土堅水平處所相機築壩以資衝刷著該督等仍照前議妥辦毋膠成見而失事機至添塘避牖一節是否確切可行應如何籌畫辦理亦著詳悉奏聞勿徒畏難而自畫也將此諭令知之○鑄咸豐通寶錢

○辛巳安奉

宣宗成皇帝

孝穆成皇后

孝全成皇后神御

於 壽皇殿○壬午諭內閣刑部奏審擬偷竊倉糧人犯並請飭

定議章程等語近來裕豐儲濟太平等倉疊有偷竊倉糧之案總
由該員弁等慢不稽查防範以致賊匪肆行實屬不成事體嗣後
應如何定議章程倍加嚴密之處著步軍統領會同倉場侍郎妥
議具奏至旗丁糧員在本省私折銀兩到通後買米回漕營私害
公其流弊尤甚著漕運總督嚴行申禁認真嚴查如有虧短立即
從重治罪並著直隸總督順天府府尹於糧船抵通時嚴飭沿河
州縣並委妥員嚴查密訪如有囤積米石售賣回漕及買米回漕
等弊卽行從嚴拏辦以除積蠹而重倉儲○諭軍機大臣等前因
琦善勘辦番回一案降旨令將前後情由據實覆奏茲據琦善奏
稱此次帶兵巡閱係自外而內以次埽除及抵柯柯烏蘇賊已聞
風遠颺竄入雪山深處礙難窮追卽將雍沙黑城二處番回殲除

黃略窪旋亦投誠並非因外賊未能得手始行移剿內匪等語著薩迎阿仍遵前旨迅速馳赴西甯一帶沿途訪查雍沙等處番回果否與外夷勾結爲奸必應剿洗其殺傷是否過當所陳先後剿辦情由果否確實有無掩飾其審擬雍沙番賊見在甘省監禁者尙有二十四名著薩迎阿到甘省提訊確供是否與琦善所取各供相符務當悉心研鞫無枉無縱琦善覆奏原摺著鈔給閱看將此由四百里諭令知之○乙酉諭內閣向來每屆年終各直省督撫於所屬藩臬道府出具考語密封進呈奉行日久各省大吏往往視爲具文本年各省密封考語率多空泛卽如河南陳州府知府黃慶安係巡撫潘鐸保舉之員該撫密考內稱其才具開展力求整頓地方不避嫌怨又另摺奏黃慶安被控收受苞苴請解任質訊兩摺係同日拜發是潘鐸出考之日黃慶安已有被控之案

該撫不得諉爲不知何以密單內於被控情節並未聲明一語殊非覈實考察之道嗣後各直省督撫於年終密考將各該員賢否實蹟指出確據臚列密陳不得僅以空言含混了事儻有保舉在先而該員不能始終奮勉亦著據實直陳毋稍回護封疆大吏朕寄以耳目腹心旌別之公私卽以定勸懲之得失若考覈不精名實不副是上以實求下不以實應安用此虛文爲也將此通諭知之○賞科爾沁郡王僧格林沁四圍正龍補服○丙戌裕祭太廟○諭內閣哈勒吉那等奏詢訪章嘉呼圖克圖呼畢勒罕查有三子一摺由理藩院將見在 雍和宮唅經之三子其名歸入金瓶將端嚕布所生之子桑哈色特迪掣定且端嚕布之子桑哈色特迪識認前代章嘉呼圖克圖曾用物件卽鈴杆素珠木碗三項應手認出則是章嘉呼圖克圖呼畢勒罕無疑矣朕心何勝歡悅

著將朕素日常用念珠一串賞給該呼畢勒罕交哈勒吉那敬領轉交該呼畢勒罕收領將此曉諭各蒙古王公及在京之呼圖克圖喇嘛等並章嘉呼圖克圖住持寺院各喇嘛外仍著曉諭駐藏大臣轉行知照達賴喇嘛班禪額爾德尼等以慰所望○是月蠲緩浙江海甯等二十州縣水旱災新舊漕糧緩徵直隸安州等六州縣江西南昌等十二縣水災甘肅河州等十一州縣及隴西縣丞所屬水旱雹霜災浙江東江等四場水災風災竈地新舊額賦展緩直隸薊州等二十六州縣浙江海甯等十八州縣河南原武等三縣災區逋賦江西南昌等二十一縣及九江同知所屬積歉銀米蘆課○是歲朝鮮琉球入貢○會計天下民穀數除江蘇福建等處未經冊報外奉天等省通共大小男婦四萬一千四百四十九萬三千八百九十九名口存倉穀米二千七百四十九萬二

千四百二十石二斗九升六合七勺

東華續錄

咸豐七

臣王先謙敬編

臣陶澐宣恭校

咸豐元年辛亥正月戊子朔 上詣 堂子行禮御太和殿受朝
不作樂不宣表詣 壽康宮前殿拈香後殿 皇貴太妃前行禮
每歲皆如之○諭內閣朕寅承丕緒撫馭萬方敬念 列聖御極
之初蠲免積逋覃敷闡澤俾人安樂利戶免追呼共享昇平之福
誠以民爲邦本厚民生正所以培元氣也當茲建元肇始之時宜
行體仁長人之政自道光十五年二十五年兩次欽奉 皇考宣
宗成皇帝恩旨將二十年以前各省民欠錢糧盡予豁免後自二
十一年迄今又屆十稔民間續有積欠允宜大沛恩綸期與薄海
羣黎同躋仁壽所有各省節年民欠正耗錢糧及因災緩徵帶徵

銀穀並借給籽種口糧牛具及漕項蘆課學租雜稅等項卽著各該督撫將軍府尹等將道光三十年以前實欠在民者詳悉查明按照該省所屬之某州某縣銀穀若干速行開單具奏候朕以次降旨全行豁免並著先將此旨刊刻謄黃徧行曉諭務使城市鄉村遐陬僻壤咸喻朝廷德意毋任官吏胥役等延閣侵漁致滋弊竇庶吾民休養生息慶洽綏豐用示朕元春布德以仰副 皇考三十年子惠元元申錫無疆至意○命賽尙阿爲大學士調裕誠爲戶部尙書特登額爲兵部尙書以阿靈阿爲工部尙書舒興阿爲戶部左侍郎由署葉爾羌幫辦大臣遷○辛卯諭內閣軍機大臣南書房翰林合詞奏請將朕履信書屋全集刊刻頒行一摺從前 皇曾祖 皇祖 皇考御極之初俱允大臣所請刊刻 聖製詩文全集頒行海內 天章炳耀 懋典昭垂朕自惟冲齡就傅以來典學

之功僅十餘載篇章未富曷敢仰媿 前徽惟諸臣籲懇甚殷自應勉俞所請因思我 皇祖刊刻 聖製味餘書室全編因朱珪向曾侍學經帷 特命詳細勘訂朕在書房經協辦大學士杜受田昕夕講求詩文積有稟本其中可存之作卽交杜受田重爲校勘編次進呈俟朕閱定再行發交繕刻○壬辰諭內閣李星沅等奏請將堵禦不力之副將等革職拏問等語廣西潯州協副將李殿元署提標遊擊事都司宋煜署柳州城守營都司事守備陶玉德前因賊匪竄踞思旺墟堵禦不力經勞崇光向榮奏參降旨摘去頂帶責令戴罪自效茲據該大臣等奏稱該員等防堵要隘所帶兵練不少乃任賊匪衝突致巡檢張鏞禦賊被戕寔屬膽玩李殿元宋煜陶玉德均著先行革職拏問仍確查如有遇賊逃避等情卽行按律嚴懲以昭儆戒○諭軍機大臣等徐廣緝馳奏廣西

勦匪屢獲勝仗及弁兵團練助勦情形一摺見在廣西兵勇雲集
經費倍增亟應續籌接濟俾得支發應手著徐廣縉於關稅等款
內籌撥餉銀二三十萬兩派委妥員迅速解往廣西以資支應毋
稍延緩將此由五百里諭令知之○諭據李星沅等奏懇撥軍餉
一摺已諭戶部速議具奏矣又據奏總兵李能臣帶領滇兵遇賊
獲勝見在合兵進勦並請簡調提鎮大員分任領兵一摺又覆奏
接到疊次寄信通籌全局等語廣西潯州府屬之金田村賊首韋
政洪秀泉等恃眾抗拒水陸鴟張自應聚集精兵全力攻勦庶期
掃穴擒渠餘匪聞而膽落該大臣所陳擇急勦辦自應操有成算
與巡撫提督隨時審度機宜同心協力會籌迅勦朕亦不爲遙制
惟賊情狡譎難保不揚言大夥所在而分遣夥匪襲我之所不備
江河分汊山徑叢雜尤須堵截周卹省毗連扼要處所均須聲

息相通勿令竄逸所請簡調大員貴州總兵秦定三甫於冬間陞見出京卽著該大臣飛咨沿途無論該員行抵何處卽飭迅赴廣西協同向榮督兵分剿所奏張家祥帶勇殺賊未必暗與賊通見值用人之際若果可資得力自當用其所長俾得立功自效若察看情形反覆無常難於駕馭則翦除奸匪內應庶不墮其術中總宜隨時體察勿稍游移致有漏洩爲要至徐廣縉疊次奏報廣西剿賊情形均在廣西馳奏之後自因相距較遠得信較遲第恐兩省奏報前後參差易致重複著該大臣等於具奏廣西軍務摺件隨時知照廣東以歸畫一而免分歧將此由五百里各諭令知之

○諭廣西匪徒滋擾前經降旨調貴州官兵二千名業已抵粵見在軍務未竣尙須添兵進剿著喬用遷再選精銳官兵一千名揀派將弁帶領星馳赴粵朕聞定廣協副將李瑞人尙勇往著喬用

遷悉心斟酌如李瑞堪以任使卽著帶領此次官兵前往軍營儻
另有得力之員該撫卽一面酌派一面奏聞刻下秦定三計當回
黔著該撫迅卽咨行該總兵無論行抵何處卽飭馳赴廣西毋稍
遲延將此由五百里諭令知之○丙申貸湖南提標常德等營兵
丁一月餉銀○丁酉諭內閣陸建瀛傳繩勛奏修復東壩情形一
摺江蘇高淳縣境之東壩爲下游蘇松等府保衛經該督等飭委
官紳確勘高下酌量丈尺估需銀一萬八千兩均由該處下游各
官紳民分別捐辦洵堪嘉尙此項銀兩著免其造冊報銷再東壩
本係官築並非民產高淳縣民自不得藉口世業圖建房屋卽著
嚴行申禁嗣後永遠不准在勘定壩基南北十二丈之內蓋屋搭
棚如實有完糧憑據卽由高淳縣查明詳請豁免其應行建復廟
祠均飭於岸上購覓隙地蓋造該督等務當嚴申禁令妥爲保護

以息水患而杜爭端○湖廣總督裕泰等覆奏宜昌襄陽衡州均係淮鹽引地應照原議由運司按其所需引數委員解交南北鹽道分銷從之○己亥諭內閣給事中袁甲三奏豁免民欠請嚴除積弊一摺又另片奏豁免之後宜禁止官民錮習等語據稱歷屆豁免積欠成案各省因駁飭行查有遲之數年而不結者良由本無限期以致展轉耽延官吏營私弊端叢出若不豫爲制防是竟以加惠之政遂若輩谿壑之私尙復成何事體此次豁免積欠值清查初歲民欠款目皆已剔清外司內部已知確數勢固較然難欺卽近年奏銷在清查以後者亦不難將徵冊串根覈其實欠數目著各直省督撫將軍府尹於奉到豁免諭旨後限三箇月卽行詳晰開單具奏戶部亦卽趕緊查明覈奏其銀穀款數稍有未符者部議時一面覈准一面將不符之處行令咨部更正毋任書吏

藉詞較換致有需索至謄黃告示該地方官務須徧貼城鄉並將里戶豁免實數清單另刊黏於謄黃之尾使窮鄉僻壤無不周知庶幾吾民得霑實惠此後杜積弊於未然在官當嚴察其侵那毋令捏災遞展豫爲巧抵之地在民當嚴禁其挖欠毋令希恩延宕豫開倖免之門總期各大吏共體朕心俾膏澤無不下究實有厚望焉將此通諭知之○以呂賢基爲工部左侍郎由鴻臚寺卿遷○庚子諭內閣御史嵩齡奏請開墾南苑間地一摺南苑爲我朝肄武之地春秋蒐獮藉以習勞 祖制昭垂具有深意該御史係屬旗人既知從前有禁止開墾之 旨何以冒昧具陳但見小利罔顧大體所奏實屬鄙陋嵩齡著交部議處○諭貴州學政翁同書奏陳修水利練水師二條農田以畎澮爲先戎政以海防爲重水利不常修則灌溉之區轉多壅遏水師不豫練則巡緝所至未盡肅清

亟宜實力講求策顏振怠著直省各督撫於境內應修塘堰陂障認真修復宣緒以除害爲興利之要其沿海地方務當督率水師將弁將礮械船隻加意振新隨時訓練俾溝洫治而井里皆豐壘澈安而萑苻悉靖朕於該大吏有厚望焉將此通諭知之○辛丑祈穀於上帝○宣宗成皇帝初周年忌辰上詣壽皇殿行禮○壬寅上奉皇貴太妃啟鑾謁西陵至盧溝橋詣龍神廟拈香詣皇貴太妃行宮問安至還宮皆如之免經過之宛平六州縣次年額賦十分之三○癸卯諭軍機大臣等陳旰奏請裁陋規一摺據稱江西學政按臨考試每府需用棚規前任學政孫葆元收受規項不一而足見任學政張芾亦復踵而加厲等語該省歷任學政是否循照舊章相沿收受著陸建瀛陸應穀按照摺內所指各情秉公確查據實具奏原摺鈔給閱看將此各諭

令知之○甲辰諭內閣李星沅勞崇光奏請分局收捐一摺廣東
暫開捐輸原爲兩省勦匪之用見在廣西需費較繁既據奏該省
紳民及外省士商捐資助餉情形踴躍若必令赴廣東報捐未免
轉增周折著准其於廣西省城設立分局就近收捐查照部行章
程妥辦○諭李星沅勞崇光奏查明臨事逃避之都司請旨革職
拏問一摺廣西署龍憑營都司譚承德於賊匪尙未入境之先卽
將關防等件交該營把總看管先自逃避迨賊匪竄入龍州該州
知州被賊掠去又未能卽時救護所稱打仗受傷之處毫無憑據
顯係捏飾似此喪心無恥實堪痛恨譚承德著革職拏問交該大
臣等嚴審確情按律治罪尋部議譚承德擬問斬監候業已畏罪
自盡應毋庸議從之○諭軍機大臣等據李星沅等馳奏各摺件
已分別明降諭旨均依議行矣另片奏縷陳籌勦事宜等語解散

脅從誠用兵之良策然須實在鄉愚無知被賊裹脅者自宜原其一綫准予自新其中詐僞情形必當確加密察儻係計圖內應探我虛實或爲利所動暫時投誠旋即反覆賞盜之戒不可不知據稱辦理可有端倪想該大臣等確察情形不至墮賊奸計且賊匪近來糧草火藥勢將不繼正當趁此機會官兵全力攻剿壯練分段兜拏以期迅就殄滅古人用兵有以多制勝者亦有以少擊眾者全在相地度機用人得當固不必盡出一轍也見在賊匪究有幾股每股頭目確係何人前次奏報均未詳悉開陳朕心甚爲懸繫所有前經添調之黔兵一千名及所請調之廣東潮州兵均著該大臣迅卽分咨飛調會剿仍當迅速籌辦毋致老師糜餉坐失事機昨據喬用遷奏訊出粵西盜匪股數並差探情形一摺鈔給該大臣等閱看其所稱賊匪姓名圖章暗號均著嚴密訪拏悉數

偵獲該大臣卽分咨雲南貴州湖南廣東各鄰省分飭各交界地方文武協力同心互相堵截如有賊匪竄往或各該省土匪與粵西賊匪勾結一經獲訊得有該匪等股首盜窩真實情形著各該督撫一面具奏一面飛咨該大臣等迅速掩擒免致遲誤前諭令查閱正鳳貽誤實在情形並此外劣蹟著卽據實具奏將此由四百里各諭令知之○賞蹕路經過看守各行宮弁兵半月錢糧○丙午 上謁 泰陵 泰東陵 昌陵詣 寶城前行禮詣 孝和睿皇后几筵前行禮恭謁 慕陵詣 宣宗成皇帝几筵前行周年大祭禮詣 孝穆成皇后 孝慎成皇后 孝全成皇后寶城前行禮復詣 宣宗成皇帝几筵前行辭奠禮○賞守護 昌陵 慕陵值班官員綬各一匹兵丁半月錢糧○丁未 上回鑾○諭軍機大臣等王懿德奏由京啟程行至河南見祥符至中牟

一帶地寬六十餘里長逾數倍地皆不毛居民無養生之路等語
河南自道光二十一年及二十三年兩次黃河漫溢膏腴之地均
被沙壓村莊廬舍蕩然無存迄今已及十年何以被災窮民仍在
沙窩搭棚棲止形容枯槁彫敝如前覽奏深堪憫惻著潘鐸親往
該處履勘查明從前如何撫恤是否辦理不善並見在窮黎戶口
實數若干應如何設法安插之處悉心籌計妥議具奏民生疾苦
地方大吏必應隨時畱意況地近省垣耳目尤切該撫自當仰體
朕懷俾中澤哀鴻得謀安集庶不負父母斯民之責也將此諭令
知之○戊申吏部以大學士賽尙阿應定何殿閣請得旨著爲文
華殿大學士○己酉諭軍機大臣等周天爵奏馳抵粵西探聞賊
匪情形一摺所論頗爲明晰並以大黃江一股會匪地險人眾亟
宜先事戡除與李星沅等前奏擇要進攻所見不謀而合昨據李

星沅奏因積雨連旬滇兵尙未到齊見在設法解散脅從懸賞購募首逆擬合湖南雲貴各處官兵加以壯練由提督向榮策遣進攻目下計已接仗李星沅向榮謀勇兼施自必將金田會匪埽穴擒渠此處辦理得手則右江各屬股數雖多自然聞風瓦解可成摧枯之勢惟行軍之要首在臨事而懼好謀而成粵西羣盜如毛豕突鴟張未可輕視卽使金田奏捷尙待次第埽除周天爵慙直樸誠甚有血性向榮亦勇敢過人朕心深所嘉許但恐過於勇往所向無前轉不免輕進疏率之失李星沅計慮務出萬全自屬老成持重但恐過於慎重又不免遲誤事機行兵事勢機宜所爭閒不容髮需遲固屬不可輕銳尤屬非宜李星沅旣命爲欽差大臣自宜總領戎行專司籌辦而周天爵向榮各受知遇重恩務各殫竭智力相助爲理見在周天爵甫抵桂林向榮在潯李星沅在柳

總須扼要分防仍復和衷合辦使三人如一人協力同心剛柔互濟泯意見而杜推諉於事方爲有濟朕引領南顧宵旰焦勞想李星沅周天爵向榮定能不負誥誠速埽賊氛以慰廑望周天爵見署巡撫職兼軍務儻各屬有須親赴勦辦未便坐失事機隨時會同李星沅等相機督勦其地方尋常事件藩司勞崇光儘可代理驛站一切臬司吳鼎昌亦可分辦固不必辭撫篆而專辦軍務也至李殿元宋煜陶玉德前已有旨革職拏問治罪著卽嚴訊定擬具奏已革巡撫鄭祖琛前經李星沅稱其尙能熟悉該處情形准令隨營差遣見在該大臣到粵已有數月自能訪知一切該革員毋庸仍畱軍營著卽飭令回籍將此由四百里諭知李星沅周天爵向榮並傳諭勞崇光吳鼎昌知之○庚戌 上奉 皇貴太妃還宮○辛亥諭內閣朕念深典學御極之始卽欲舉行日講舊典

禮臣以乾隆嘉慶年間兩朝訓諭皆以此事易滋流弊徒尙虛文俱奉命停止是以斟酌未行然朕心未嘗不念茲在茲也尙書有言曰辭尙體要又曰不由古訓于何其訓儒臣進善於君援古卽以證今若紛紛論列時事恐啟挾私逞臆之端轉失講道沃心之義朕幾務餘閒將於翰詹諸臣中輪流選派親命題目各擬講義分日進呈在朕旣可以古爲鑑且以觀諸臣器識學問爲量能授任之資庶幾上下交相勉勵用副朕集思廣益崇實黜浮至意○諭給事中蘇廷魁陳奏一摺朕詳加披覽所稱求宏濟之道防驕泰之萌意在推誠任賢慎始圖治能見其太朕甚嘉之其論孝廉方正一條亦合循名責實之意著各省督撫學政認真訪擇務將品學兼優眾所推服之人切實保舉以備錄用毋得虛應故事名實不符如所舉非人惟濫保之員是問其各慎之○徐繼畲

奏洋人已於十一月十二日內先後搬至道山觀居住將神光寺房屋交還並將用印之租約繳還塗銷係責成前任侯官縣知縣興廉辦理 上命裕泰查明徐繼畲有無回護徇庇等情據實具奏尋奏徐繼畲責成該革員經理實因與洋人先有搬移之約不使該革員置身事外尙無回護徇庇別情報聞○以福建上年晚稻歉收暫緩各屬買補動缺倉穀○壬子諭內閣翰林院自學士以下詹事府自庶子以下著該衙門將見任人員名單開列進呈按月更換一次○以英人船隻在琉球國逗遛諭徐廣縉相機開導令其撤回○江甯布政使楊文定奏回任日期得旨爾之才具斷不至因循廢事但屬員之因循蒙混尤應認真察劾不患不明惟患不公朕期汝事事須一誠字一當字○癸丑諭軍機大臣等有人奏會匪結黨勾引蔓延請飭查辦一摺並請嚴禁私礦出境

等語據稱漳州府屬會匪嘯聚數萬人以廈門人陳罄同安人王
泉爲大頭目設局斂錢鄉愚被其煽惑橫行郡縣恣意截搶嚇索
上年十一月間有賊王靖李景黃允劉四等各擁眾入會地方文
武不能查辦見在漳泉各處道途梗塞似此盜賊公行若不及早
殲除必致釀成巨案裕泰甫經簡調無所用其回護著於到任後
嚴密確查該匪等有無勾通夷匪假借名色迫脅良民其傳習者
共若干縣實在黨與人數多少與兩廣土匪是否聯爲一氣密飭
明幹妥員不動聲色將頭目陳罄王泉先行購緝設法擒獲其餘
以次偵捕不難悉數就擒該省武職陳興隆尙知認真緝捕而文
員乃專事輕縱此種惡習必應懲創毋令該地方官以容隱在前
意存消弭規避處分至淡水廳屬產有硫磺有無奸民偷採往販
外夷亟宜實力查禁著一併嚴飭該鎮道查明覈辦並嚴派委員

前往訪查曾否封禁以杜奸萌是爲至要原摺片著鈔給閱看將此諭令知之○命陳慶偕來京陛見以劉源灝署山東巡撫

由布政使

署○甲寅諭內閣徐廣縉葉名琛奏勦捕賊匪大獲勝仗一摺據

稱連平州屬九連山一帶前有前經擊敗之匪徒屯聚意圖北竄經該督撫飭委員弁分三路進兵探知大夥賊匪盤踞和平縣屬之洲頭墟卽於十二月二十五日五鼓督率兵勇兜擒追殺翻山十二重接仗五次計殲斃賊匪二百五十九名生擒一百三十八名餘匪復於次日經署連平州知州吳昌壽帶領兵勇殲擒多名詔州一帶潰散匪徒既經痛加勦洗不難全力殲除著卽督率文武將佛岡英德山內藏匿匪徒嚴行搜捕毋任伏莽潛蹤以期淨絕根株迅速肅事至高州廉州各屬與廣西毗連防勦尤關緊要提督陶煜文見已抵任著卽前往該處會同高廉道宗元醇妥籌防

勅毋令兩省交界處所句結蔓延以靖賊氛而綏邊圉○修浙江錢塘餘杭山陰會稽蕭山上虞六縣塘隄各工○乙卯諭內閣慧成奏豫禁侈言祥瑞一摺並片奏整頓吏治等語所奏甚是深契朕衷蓋國家以賢才爲寶豐年爲瑞朕寅承丕緒夙夜惕乾敬念皇祖仁宗睿皇帝親政皇考宣宗成皇帝御極疊奉訓諭以侈言祥瑞近於驕泰惟益勵寅恭共圖上理於日月合璧五星聯珠諸奏皆不准宣付史館朕何敢不恪遵成憲以迪前光近來內外臣工章奏尙無鋪陳符應粉飾太平之語但杜漸防微不可不交相儆惕況此時東南民氣甫甦少蘇而兩粵用兵邪氣正熾若惑於浮說徒貽笑於後人內外諸臣當以敬慎存心不可少蹈浮夸之習惟期政通人和年穀順成以副朕志至於吏治廢弛苦口訓誡何啻再三無奈各省州縣親民之官深染積習因循

不振總由大吏甄覈不明勸懲不公以工於趨承者爲開展以拙於應接者爲迂拘遂至惴惴之吏沈抑下僚奔競之徒濫薦薦牘人材不振國計民生將何賴焉各督撫大吏或受先朝厚恩或由朕加特簡於用人行政之際果能破除情面慄遵成法事事矢以實心濟以實力何慮頽風不能盡挽賢才不能奮興轉移之權操之自上諸臣亦分任其責其各洗心滌慮其襄郅治勿復視朕言爲具文也將此通諭知之○丁巳諭內閣手郡王奕諱著於四月二十日卯時入學讀書○是月給安徽鳳陽五河二縣災民一月口糧緩徵山東濟甯等十九州縣並德州等四衛被水被旱被雹災區額賦貸江西德化湖口二縣被水災民籽種給湖南澧安鄉二州縣被水災民一月口糧並貸武陵縣農民籽種

二月戊午朔祭大社大稷○庚申諭內閣給事中汪元方奏

請停增附捐納教職一摺教職有考課諸生之責增附生員學業
尙淺驟令司鐸不足以示矜式著卽將增附捐教一條永行停止
至前項捐生已經選補者應不准其濫膺保薦其應如何酌定限
制之處著該部議奏尋奏增附出身之教職擬請俟二次六年俸
滿方准保升其有續經中式舉人副貢者照例扣滿六年以知縣
保升從之○署廣西巡撫周天爵奏請設局收捐米石以裕軍儲
從之○辛酉諭內閣 皇考宣宗成皇帝梓宮永遠奉安 山陵
據欽天監奏謹擇於咸豐二年三月初二日並擇於明年四月十
一日行釋服禮所有應行典禮及一切事宜著各該衙門屆期敬
謹豫備○壬戌諭內閣前有旨令河南布政使張集馨於道經山
西時會同按察使孫毓汶查辦見任陝西按察使多慧被參各款
茲據奏稱多慧前在山西雖訊無與放債之孟春亭結拜兄弟及

爲休致知府李元慶彌縫病狀並升調各缺亦無染指各劣蹟惟以監司大員違例借貸不知自愛又失察跟役向孟春亭送禮抽豐並於督辦清查一案其兄多瑞前在介休任內虧短甚鉅並不引嫌自避又復含混具詳有心取巧咎無可辭著交部嚴加議處山西巡撫兆那蘇圖查無徇情容隱情事惟於多慧詳辦清查未能通盤籌畫辦理不無流弊著交部議處所有隨同畫橐之司道一併交部查取職名照例察議山東陽信縣知縣多瑞虧短介休縣任內正雜各款一萬六千八百餘兩著山東巡撫嚴飭該員勒限半年解交山西藩庫清款毋任延宕○諭穆騰額等奏將哲布尊丹巴呼圖克圖呼畢勒罕轉世之幼童驗看掣定一摺上年十二月初九日據駐藏大臣等會同達賴喇嘛喀微阿齊圖諾們罕及伊徒達喇嘛等帶領眾喇嘛等經由金瓶掣出番民密瑪爾之

子烏金策仁之名定爲呼畢勒罕達賴喇嘛當據經理將哲布尊丹巴呼圖克圖之呼畢勒罕名爲哲布尊阿旺吹濟旺渠車拉嘉木磋德此事甚屬吉祥朕心殊深忻悅著加恩賞給該呼畢勒罕黃手帕一方佛一尊大段四卷並交庫倫辦事大臣德勒克多爾濟等轉行曉諭喀爾喀四愛曼之汗王及伊徒喇嘛等知悉所有應行辦理迎接哲布尊丹巴呼圖克圖之呼畢勒罕事宜著交德勒克多爾濟等先行敬謹妥爲辦理○甲子諭內閣從前內外見任大員之兄弟子孫五年一次挑取侍衛拜唐阿當差挑取後尤須習學清語技藝騎射以爲差使得人起見自道光二十六年查辦以後迄今已逾五年又屆應行查辦之期惟思該太員子弟內或身體懦弱馬上平常或自幼讀書未能及時習學騎射此輩卽使挑爲侍衛拜唐阿又焉望其得力耶自應量爲通融辦理嗣後

在京文職自三品以上武職自二品以上外任文職自總督以至按察使武職自將軍提督以至總兵該大員之兄弟子孫內如有年已及歲於侍衛拜唐阿差使相當遇五年查辦之時情願挑取者著該大臣等仍照從前呈報該旗由該旗造冊咨送軍機處彙奏經朕指出者帶領引見儻有身弱殘疾抑或騎射平常不能挑取侍衛拜唐阿著該大臣卽行據實呈明該旗轉行軍機處聽其自便該旗亦不必指名催取以示朕普育旗僕量材器使之意○乙丑諭內閣傳繩勛奏遵查豁免積欠請旨遵辦一摺向來查辦豁免積欠降旨指豁自某年至某年者總以奏銷截數爲准若未入奏銷不得統作積欠蠲免歷經該部纂入則例一律遵行本年元旦經降旨飭令各該省將道光三十年以前實欠在民者詳查具奏候朕以次施恩各該省遵旨查辦自應仍照舊章凡實欠應

蠲總以欠數已入奏銷爲准其道光三十年正賦此時尙未奏銷不得謂之積欠著再通諭各直省督撫將軍府尹等遵照從前成案並見在戶部議行各事宜明晰曉諭分別辦理毋致小民誤會觀望致礙新賦庶應蠲者實惠均霑應徵者輸將無誤官吏人等自不至有影射蒙混等弊至傳繩勸奏稱江蘇道光二十九年漕項雖未歷過奏銷但地丁漕項向係一條編徵難以劃分著准其按照嘉慶二十三年成案一併查明請旨豁免各督撫等各就該省應豁民欠數目詳細句稽覈實查辦使布德行惠之典比戶周知用副朕意將此通諭知之○諭軍機大臣等有人奏陝甘總督琦善之胞弟琦齡前在固原州安定縣各任內虧空甚鉅謊報完繳率請開復令各屬代爲彌補以致無處不虧甯夏虧數最多秦州肅州平羅甯朔等處均有虧缺因代琦齡賠補虧空得免參撤

又有余魁曹玉盤踞甘省出入衙門行私納賄曹玉向與劣幕孫芷清朋比爲奸余魁前經犯案追繳捐照遞回原籍近乃詭入皋蘭籍貫干預公事等情事關大吏袒護親屬貽累屬員清查不實不盡虧缺之員應參不參甚至縱容犯案棍徒仍前逗遛干預均應徹底查究菩薩迎阿將所指琦齡及各州縣虧空代賠實數確切查明具奏並將余魁等劣蹟訪查嚴行訊辦原奏片鈔給閱看將此諭令知之尋奏遵查肅州等屬虧空實數知縣聶爾耆等並無代琦齡彌補情事著賠之項業咨四川省追繳應毋庸議余魁應照長隨盤踞衙門例杖一百枷號一月遞回原籍曹玉世居皋蘭縣城訊無盤踞出入衙門等事應毋庸議下部議從之○諭據杜受田呈遞奏單一件縷呈兩粵匪徒先後滋擾情形及賊匪名目已革總兵盛筠首爲招撫之議以致匪徒日益猖獗並擬整軍

威募精勇勸鄉團察地形務解散五條頗爲詳晰著李星沅等按
照單內所陳詳加採擇體察情形認真妥辦廣東兵勇是否可資
得力前調潮州兵一千名是否已到至所稱象州紳士韋姓以本
地團勇殺賊地方官僅給薄賞遂致聞散博白縣亦有鄉兵逾境
殺賊宣化貴縣團勇力拒賊匪官兵不能救應等語著卽派員確
切查明分別勸懲以勵眾心至張家祥是否悔罪自效前已諭令
查辦盛筠如何貽患著仍遵前旨一併確查據實參奏原單著鈔
給閱看將此各諭令知之○丙寅諭內閣訥爾經額奏豁免積欠
旗租請旨遵辦一摺各直省民欠錢糧前經降旨將道光三十年
以前已入奏銷者全行豁免此項佃種旗地之民近隸畿疆同深
望澤允宜共沛恩施所有直隸各州縣道光三十年以前實在民
欠各項旗租並各案補徵銀兩著加恩一體豁免該督卽刊刻謄

黃徧行曉諭毋任胥吏舞弊務使實惠均霑用副朕布德推恩至

意○丁卯以易棠爲陝西按察使

由廣東廣州府知府遷

○戊辰諭內閣載

銓等奏考驗過身兼十五善射善騎射善鵠射之公侯官員兵丁等騎射分別去畱請旨一摺又據奏載銓腰痛中山逾歲所兼之善騎射十五善射懇請開缺等語載銓所兼之善騎射中山所兼之十五善射善騎射俱著毋庸開缺俟將十五善射善騎射善鵠射帶領引見時再行酌降諭旨其由兵缺十五善射見升任五品以上應入於官缺十五善射之乾清門頭等侍衛那瑪善等三十一員朕於本月二十四日二十五日在御箭亭閱看步箭○戶部議覆閩浙總督劉韻珂等奏查明臺灣府屬地丁錢糧虧那寶數請旨飭下閩浙總督福建巡撫轉飭臺灣府屬按員分別追繳毋再另行立限從之○庚午諭內閣李星沅周天爵向榮奏進剿金

田逆匪情形並上龍土司等地方勦匪各一摺又片奏各屬擒獲匪犯等語廣西桂平縣屬金田逆匪竄踞大黃江一帶地險人眾經提督向榮等督飭文武員弁合力進攻於正月十八日直抵賊巢連環攻擊自辰至午轟斃賊匪二百餘名並拋擲火具燒毀賊巢房屋多間乘勢進追又斃賊匪數十人其由別路進攻之水陸壯勇復分投攻勦殺斃數十名該匪退竄回巢負嵎固守至龍州之上龍土司一帶有大批賊匪滋擾經該鎮道督兵分路夾擊殲擒匪犯多名署守備楊致英手刃執旗賊目二名奮勇可嘉永康州之都結佶倫等土州地方亦有賊匪奔竄見已派兵馳往勦捕務須嚴密按拏勿任蔓延其南甯府文武於隆安縣境勦斃賊匪三百八十餘名並將賊首殲斃太平梧州等府修仁等縣疊經拏獲戕官匪犯及曾降旨飭拏各犯多名分別正法辦理尙屬認真

所有獲犯出力各員及兵練等均著查明覈實保奏候朕施恩○諭軍機大臣等李星沅等奏進勦金田大股賊匪雖少有擒獲弁兵亦有傷亡急宜厚集兵力設法兜擒庶不至勞師糜餉所有續調貴州官兵一千名據喬用還奏飭令李瑞等管帶兼程赴粵計已馳抵軍營前准調之廣東潮州兵據徐廣縉奏稱該省高廉一帶防勦正當喫緊之際勢難分兵前往儻兵力實有未敷著李星沅等悉心商酌應調若干名准其仍於湖南廣東各府屬一面飛咨調取一面具奏以期迅速蒞事至所需餉銀計由部撥解及廣東撥往爲數已不爲少見在捐輸業經設局於經費亦不無接濟如收有成數卽著隨時奏聞周天爵前奏調各員內江蘇候補道周燾朕聞係巡捕出身專事鑽營行止貪鄙又廣東候補千總香山縣武舉韋允升於道光二十一年以團練勇丁爲名冒領帑項

肥己當此藉資羣策之時既經該署撫奏請差遣朕無不俯允所請惟人不易知儻用之不當轉受欺蒙恐貽後悔朕既有所聞特諭知李星沅周天爵隨時查訪如實係得力之員自不妨舍其所短用其所長或喜事貪功無裨實用斷不可因已經奏調稍存遷就之見該大臣等忠君體國和衷共事因材器使自必慎之又慎也將此由四百里諭令知之○諭徐廣縉馳奏遵籌接濟廣西軍需並潮州兵難再調一摺所稱廣東近年撥解支銷爲數旣多兼之清遠英德高廉等處軍務未戢以後勢難再籌自係實在情形粵東見開捐輸事例報捐官商諒已陸續具呈俟收有成數著卽奏報酌量緩急以備兩省軍需又據稱潮州兵一千名已派往高廉一帶防堵無可再調等語該督兼轄兩省潮州官兵見雖無可再調粵東何處之兵尙可調用務須通盤籌畫隨時知照李星沅

周天爵商酌辦理如粵西兵力不敷該督卽一面奏聞一面派兵前往接應慎勿遲誤事機將此由四百里諭令知之○辛未都察院奏河南紳士王正誼以捻匪窩竊勒贖冒官搶劫等詞赴臣衙門具控據稱本族兩莊與商邱縣郭老家集連界郭姓人多勢橫慣窩賊匪自道光二十四年起匪首郭鎖卽郭聲海郭狗毛郭蟲等時常糾眾持械搶竊勒贖卽如夏邑桑堙集一村周圍僅十餘里勒贖至百餘家均有姓名案卷可查二十七年五月間本莊被郭鎖等搶麥五畝遂與堂兄王永康等稟縣控府蒙拏郭二魁郭狗毛擬辦匪等從此挾讎三十年六月間郭狗毛逃回又搶本莊秫禾四畝因復控縣關提不料匪等聞知率領百餘人各執槍刀等械將族人王時榮扎傷幸有鄰里救護亦將該匪夥郭得格斃尤可駭者十月十八日夜差役聞廷文領同郭鎖劉三盧良等多

人假裝官員以郭宗邦爲引綫突至族人王瀾池家撞門入室聲言縣主與武營同來拏人將衣物席捲一空又至王時協家毀門砸窗亦被搶劫王時協見有頂帽二人手執刀械餘各運取衣物罵伊混充官長匪等遂將王時協劈扎多傷並與王瀾池同捆車內拉至黃姓歇店郭鎖等恐人知覺攜賊逸去當經王時協等報縣勘驗等語查該紳士所控商邱縣郭老家集捻匪郭鎖等糾眾持械搶竊勒贖假充官長夤夜入室劫物傷人實屬目無法紀若不嚴拏各犯盡法懲辦何以杜後患而儆兇頑上諭軍機大臣等河南捻匪橫行實屬目無法紀若不嚴行懲辦恐致蔓延鄰省釀成巨案著潘鐸按照所控各案悉心研鞠務得確情並嚴飭該地方官認真查拏將各犯悉數弋獲斷不准一名漏網○調書元爲刑部右侍郎以禧恩爲戶部右侍郎

二等輔國將軍

○壬申諭內閣陸

元煥奏防堵情形等語江西南贛各屬多與粵省毗連經該署撫派委贛南道黃樂之贛州府知府周玉衡候補道蔣啟敳等帶領弁兵分路防守上年十二月間有廣東英德等縣匪徒乘夜明火持械直撲定南之龍子嶺被都司遮克敦布等開礮擊退又有匪徒竄至龍南之芳竹嶺經都司安勇等開礮擊傷賊首數人擒獲匪黨五名並據周玉衡等先後稟獲匪犯三十名防堵尙屬認真此股匪徒雖經粵省截殺殲擒難保無潰散餘匪復行竄入江西地界巡緝不容稍懈其與兩粵毗連之湖南福建雲南貴州等省仍著不分畛域協力防守一有匪徒竄逸立即盡數殲拏毋任漏網如有疏虞以致蔓延滋擾惟各該督撫是問懷之○諭軍機大臣等前因俄羅斯頭人私入邊界阻攔查邊道路當由理藩院行查該國旋據薩納特衙門覆稱奉到咨行已札交邊界官俟其查

明再覆茲又接據該國薩納特衙門咨理藩院文稱上年伊犁官員在庫克烏蘇河與該國頭人會遇時告以哈薩克時常偷竊馬匹經該頭人代爲尋獲馬一百五十匹駝六隻令哈薩克素勒坦送交伊犁官員領有收到回頭並稱因哈薩克本係該國所屬伊等偷竊牲畜自應查尋繳還等語查上年薩迎阿奕山具奏俄羅斯私入邊界情形並兩次覆奏均未提及向俄羅斯索取哈薩克偷去牲畜之說何以該國來文以此藉口且稱令素勒坦送到領有回頭又似確有其事俄羅斯入邊在道光二十九年八月是時適有哈薩克賊犯偷馬一案所奏訪獲情節牲畜數目不甚相符是否卽係此事原奏係據佐領富珠爾泰稟報該佐領與該國頭人巴噶會晤時有無向其私懇代尋馬駝情事收到回頭何人所給著奕山布彥泰卽行逐細查訪明確據實具奏不准稍有隱飾

同護見在該頭人等是否尙在哈喇塔拉迤北距卡倫六百里外
地方居住上屆兩年應收哈薩克馬租曾否收取又該國請赴伊
犁商議貿易一節果否遣人前來一併覆奏事關外夷邊界必應
慎重覈實辦理一俟該將軍等奏到再由理藩院備文飭知所有
薩納特來文並譯出清漢文二件均著鈔給閱看將此諭令知之
○乙亥諭內閣顏以燠覆奏遵查十字河西隄改挖新河窒礙難
行並繪圖呈覽一摺據稱事無把握流弊較多不能計及久遠自
毋庸輕議更張惟十字河爲漕船經由要地該河督務當督飭員
弁循照舊章隨時搶撈俾重空軍船往來暢行並飭認真挑挖囊
沙引渠俾免淤墊儻有阻淺遲誤惟該河督是問○戶部議覆兩
江總督陸建瀛等奏江蘇清查倉庫虧墊確數一摺江甯藩司所
屬共虧銀二十二萬六千有奇蘇州藩司所屬共虧銀四十八萬

五千有奇俱係有著之款請飭嚴追從之○丙子諭內閣步軍統領衙門會同倉場侍郎遵議稽查防範倉儲章程均著照所擬辦理惟太平萬安二倉西面俱附城牆仍恐賊匪由城上鉤擄爲奸著步軍統領衙門嚴飭城門領催等隨時加意防範並著查城王大臣一體認真稽查總期益加嚴密毋得再有疏虞至京通各倉值宿監督由倉場侍郎責令無分晝夜不時稽查如有曠誤卽著從嚴參辦○丁丑諭內閣廣西匪徒滋擾各郡前經降旨將提督閔正鳳革職諭令李星沅徐廣縉嚴查該革員並已革總兵盛筠貽誤各情茲據李星沅徐廣縉查明覆奏閔正鳳身任提督全省營伍皆歸統制乃於賊匪在府城外肆行搶劫並不親往督捕追官兵打仗陣亡多人仍未渡河救應賊首陳亞潰肆擾修仁荔浦等縣被兵擊走閔正鳳時在象州並不扼要堵截幾致賊首漏網

似此養癰貽患退縮無能若不立予重懲何以勵將材而作士氣
閔正鳳著卽發往新疆充當苦差此時兩粵正當勦捕緊要之時
如有身歷戎行有心玩誤者該大臣等嚴查參奏必立正刑誅以
肅軍律寬典不能倖邀也至已革左江鎮總兵盛筠平日訓練無
方臨事又多貽誤本應一併發遣見已病故著無庸議○諭軍機
大臣等據李星沅周天爵奏廣西省大兵均駐潯郡南太各路酌
派防勦並咨會廣東一體堵擊等語潯屬金田會匪勦辦尙未得
手官兵齊集該處南太二府地居上游鞭長莫及盜匪愈形猖獗
見在廣東提督陶煜文帶兵馳勦廉州一帶若粵西無兵合勦勢
必北竄蔓延各股糾結屯聚益恐難制前聞會匪與盜匪不相聯
絡如果金田匪徒負嵎堅拒一時難以撲滅而南太盜匪日熾上
游兵力單弱不免顧此失彼於大局深爲有礙兵機操縱變化不

可執一諒李星沅周天爵定能通籌全局酌量緩急一面會同向榮督率潯州大兵廣設方略確查賊首蹤迹或誘令離巢或乘其不備將該處大股逆匪迅速剿除一面嚴飭鎮將等督率兵勇將太平近邊土司一帶賊匪相機剿捕如有欽州靈山各處匪徒被廣東偏竄入卽行會合堵截勿任逃竄十萬山一帶致難接捕如該處兵力不敷仍遵前旨酌量調撥援應勿誤事機總之東西二省境界毗連匪徒奔突竄擾難分彼此李星沅總統戎行固可便宜從事徐廣縉統轄兩省亦屬責無旁貸務當與周天爵向榮等協力同心會商合辦於撥餉調兵有應彼此通籌之處均應不分畛域推誠相與一以國事爲重庶幾速殄賊氛太平等處均有通越南之路儻賊匪由土屬竄逸迫近該國該大臣等應卽豫先行文知會越南國王告以匪徒情形令其自行保衛以免越境滋

擾至廣西客兵雲集待餉孔殷前諭徐廣縉續撥廣西軍餉見解
十萬兩務卽湊足三十萬兩速解濟用勿誤急需將此由四百里
各諭令知之○己卯諭內閣上年冬至以後雪澤稀少氣候頗形
乾曠入春以來冷暖不時昨已節過春分密霰凝寒本日始放暄
霽朕念切民依時時返躬內省深恐措施未當不能上感天和去
冬禮部彙題烈婦一本朕以向來夫亡無偪迫等情遽行殉節者
例不准旌雍正年間 聖諭煌煌原於維持風化之中寓愛惜民
命之意並經內閣照例票擬雙籤呈進遂用不必旌表之籤發下
迄今事後追思該烈婦等身殉其夫舍生取義究屬人所難能而
各省歲終彙題不過二三十人未必遽開輕生之漸若給予旌表
亦足以激薄俗而勵綱常所有上年禮部彙題各直省夫亡殉節
之烈婦彭氏等三十七口仍著准其一體旌表以慰貞魂該部卽

遵諭行○諭軍機大臣等昨有旨諭李星沅等廣西大兵均駐潯州其南太一帶界連高廉深恐兵力單弱不能扼要堵截已飭令該大臣等通籌全局派兵防剿矣因思重兵雲集統帥需人將領難資分遣上游地方文武控制維艱防剿稍疏所關非細本日已特降諭旨令廣州副都統烏蘭泰馳赴廣西幫同該大臣等辦理軍務並令湖北鹽法道姚瑩馳往軍營交該大臣等差遣委用該二員到後應如何協勦分防之處著該大臣等相機商辦庶幾布置周密不至顧此失彼右江鎮總兵惠慶右江道慶吉所屬賊匪肆擾自上年以來並未聞該鎮道如何調度是否株守偏隅一籌莫展著該大臣等迅即查明據實具奏該省前後撥解餉銀不下百餘萬兩軍需總局責任綦重見又分局設捐經理皆須得人勞崇光職任藩司自應統籌一切第支應紛繁非得廉明公

幫辦恐稽查未周致滋冒混務當分委賢員協同妥辦責令實心經理其各路分局亦必須委用得人庶免濫應侵欺等弊頃有人奏署桂林府廉良澤貪鄙狡猾工於趨承鄭祖琛受其欺蒙若如所奏令其辦理糧臺必致貽誤該大臣等畱心察看儻有劣蹟卽行參辦將此由四百里諭知李星沅周天爵向榮並傳諭勞崇光知之○諭廣州副都統烏蘭泰向於火器最爲畱心如有製造得用各器械著烏蘭泰酌量帶往廣西軍營以資運用其平素操練得力之章京兵丁亦准酌帶數人一併馳驛前往將此由四百里諭令穆特恩徐廣縉並諭烏蘭泰知之○庚辰諭軍機大臣等穆騰額鄂順安奏廓爾喀王懇請遣使朝貢一摺廓爾喀王請進登極表貢情詞懇切自應准其恭進惟來年卽係該國例貢之期所有呈進表貢著令其統俟咸豐二年例貢時一同恭齎來京呈進

以省跋涉之勞穆騰額等卽檄諭該國王欽遵辦理將此諭令知之○辛巳上御箭亭閱十五善射翼日如之○李星沅周天爵向榮奏金田逆匪自正月攻剿之後尙踞大黃江牛排嶺等處憑恃險阻臣榮四路圍截二月初三日該逆分股詐誘我兵臣榮派雲貴官兵移紮佛子口親率楚兵馳赴夾洲按剿逆匪又復詐退從金匏村出撲搖壯營盤分撲大營經雲南鎮將開礮轟斃賊匪百數十名梧州兵丁柳肇先立斃長矛賊匪賊勢少卻臣榮准備嚴防慮及該匪另有詭謀果於初五日賊分三大股擁出當卽督同總兵李能臣等會督兵勇分隊進攻廕生向繼雄率勇堵其北面該匪又有大夥伏在正南竹林臣榮督飭兵勇槍礮轟擊自寅至午斃賊無數都司龍金源親然擡礮傷斃該匪多名乘勢衝殺將身穿紅袍賊首一名手執藍旗賊目一名轟斃匪眾潰竄先後

熾賊一千數百人此次痛加剿洗匪勢已極窮蹙惟探聞

政韋元炳洪秀泉等極爲兇悍而賊股分踞各屬者亦尙不少彼

此暗通消息互爲救援我軍專駐金田未能分股剿辦恐有顧此

失彼之虞

臣

等惟有竭盡血誠和衷籌畫務將金田股匪先行剿

滅再圖節節掃蕩

上諭軍機大臣等李星沅等奏進攻金田大

股逆匪疊獲勝仗並遵查賊匪股數名目添調精兵協剿各一摺

又片奏各屬剿匪獲犯情形金田村大股逆匪經此次痛加擒剿

大挫賊鋒正可乘勢激勵將士直抵賊巢不難立就撲滅惟賊股

甚多分擾各屬難保不暗通消息彼此互爲救援以爲牽制我師

之計重兵均駐金田各屬兵力頗形單弱該大臣等務當通盤籌

畫嚴飭各屬文武將弁合力兜擒勿致顧此失彼逆首韋政韋元

炳洪秀泉及各股匪首等尤宜設法偵獲勿令乘閒竄逃李星沅

周天爵向榮皆朕特簡大員深資倚畀前降諭旨殷殷訓勉無非推心置腹之誠諒諸臣必能協力同心和衷共濟以紓朕南望焦思也勉之望之將此由五百里各諭令知之○諭廣西見在軍務未竣尙須添兵協勦著張亮基喬用遷於雲貴兩省各選精兵一千名派定將弁管帶俟欽差大臣李星沅等咨調到日卽飭迅速馳赴廣西聽候調度並著駱秉章於湖南省各營內豫選精兵咨詢李星沅等應調若干名卽派將弁管帶前往將此由五百里各諭令知之○以勦辦金田逆匪獲勝賞提督向榮巴圖魯名號○壬午傳繩勛以病免以楊文定爲江蘇巡撫調祁宿藻爲江甯布政使以椿壽爲湖南布政使瑞元爲湖北按察使由科布多參贊大臣遷○甲申定郡王載銓等奏會議湖北清查一案計虧短正項雜捐及米穀折價共銀四十六萬八千有奇請飭湖廣總督湖北巡撫遵

照奏定章程迅速嚴追從之○乙酉諭內閣楊殿邦奏浙省兌漕
遲延情形又片奏蘇松等屬亦未兌足等語本年新漕前經飭令
提前趕辦必須早兌早開方能依限北上乃據奏稱浙江有漕各
屬因有查豁積欠恩旨民間未諳定例以致徵兌遲延江蘇蘇松
太三屬亦未據報兌竣向來查辦積欠未屆奏銷者不准豁免例
有明文前已明降諭旨通飭曉示各省接奉後諒已明白示諭新
漕自必踴躍輸將至漕船兌足開行全在各官吏經理得宜迅速
催趲始得遄行無誤豈容藉口耽延卸責著江蘇浙江巡撫嚴飭
各州縣將起運漕糧趕緊交幫受兌立即開行並會同該漕督督
率各該糧道分飭縣幫一切妥速辦理儻有遲誤查明係何縣何
幫卽行指明嚴參懲辦其江廣漕船並著沿途各督撫一體飭屬
催促及早抵淮以速漕行而符例限○諭軍機大臣等朕聞邪教

流傳蔓延數省河南祥符縣有吳光漢僞稱赤天大王四川綦江縣有馬武成僞稱赤地大王廣東英德縣有李三文僞稱赤人大王均爲各省邪教總目之首此外總目尙復不少其教與天主教同宗一派英夷在粵散布頭目勾結黨與且有內地革紳王如繼張懷亮匪徒徐繼龍等附彼助謀至邪教頭目所住地方其徒充當衙役爲之探事差弁查拏先通消息一時未能緝獲似此邪教蔓延若不豫爲之防勢必釀成巨案著徐澤醇徐廣縉葉名琛潘鐸等遴選妥員不動聲色嚴密偵訪如查有傳教各頭目及包庇串通之衙蠹迅卽掩揜研究徒黨咨行鄰省一體訪拏懲辦以杜其勾結之漸至保甲清賊匪之源團練備守禦之法該地方官果能實力奉行何至匪徒潛相煽誘各該督撫總當弭患未然勿致養癰貽害但須持以愼密不可稍涉張皇轉滋擾累將此各諭令

知之○山西巡撫兆那蘇圖以辦理清查未善奏謝降級畱任恩
得旨多慧係汝所明保之人朕以汝平日尙屬認真故從寬僅予
降畱乃不知倍加感激於摺內仍照例數語昧良負恩莫此爲甚
朕尙可欺天豈可欺乎嗣後爾若能盡改前愆庶可仍邀眷遇若
自甘暴棄復蹈故轍則革職逮問矣朕近聞汝好與朝臣交往甚
屬卑鄙有則改之無則加勉此係朕所聞特諭汝知之非罪汝也
正愛汝也○丙戌諭內閣朕每日御殿召見內外大小臣工詢事
考言固以通上下之情尤當防漏洩之漸 皇考宣宗成皇帝前
曾特頒 硃諭飭令豫備次起召對之人及奏事處帶領之總管
首領太監等俱著在廊下祇候不准擅進明殿 聖訓昭垂寓有
深意上年因冬令嚴寒諸臣分起進內待召需時暫令在懋勤殿
旁屋祇候以示體恤惟思該處係裏邊太監執事之所語言交接

易啟屬託之漸若輩行爲何所不至所關非淺著內務府於乾清宮西階下之西添設板棚一座嗣後豫備召對之大小臣工卽令在棚內憩息藉避風雨於挨次召見亦可不致遲誤並著御前大臣軍機大臣等隨時畱心查察凡召見引見官員人等概不准與太監接談交涉在諸臣各知自愛當不至故違訓誡自蹈愆尤儻太監等有不遵約束者卽著該大臣等指名奏參加等治罪此旨著軍機處奏事處上書房各存記一道○諭軍機大臣等奕興奏遵查奉天海疆情形請籌款添設船廠以資防捕一摺據稱奉天洋面上年商船疊次被劫因山東捕拏嚴緊竄入北洋當卽委令水師營弁前往山東訪求緝捕之法並與山東巡撫陳慶偕往返札商講求辦理見已仿照山東章程添造開風船二隻廣艇船二隻連礮位器械並招募水勇責成金州副都統督率駕馭等語該

將軍既與陳慶偕札商籌議自應不分畛域同心協力會商妥辦
惟奕興所稱新添船械查照山東辦法飭令黃富興就近在廣東
代爲招募製辦仍派員往粵會同駛回奉天一節是否可期濟用
不至往返需時有誤事機又所稱統計經費約需銀五萬兩暫由
盛京戶部庫項借用另片奏奉天海口每到商船一隻勸捐銀一
兩約計十數年即可補足一節盛京本無閒款可籌勸捐易滋流
弊此項所需本省有無另款可以協濟著陳慶偕一併會議卽作
正開銷亦無不可奕興原摺片均著鈔給陳慶偕閱看將此各諭
令知之○是月緩徵廣西本年額賦